

ጳውሎስ ሮሜ አሳው ፃፊዳ ኪታ ጌሉዋ

ዩሱሲ ኪቲዳ ጳውሎስ ሮሜ አሳው ፃፊዳ ኪታይ፣ ጳውሎስ ሮሜን ዳዲያ ዋሳ ጎሊያ ያሞሳናው ቆፔዳ ዲራው፣ ኢ ባናሲ ኡንቲንቱ ጊጊዳ ናጋናዳን ኦላናሳ። ጳውሎሳ ቆፋይ ሮሜን ዳዲያ አማኒያዋንቱና ጉላ ዋዲያ ኦሌዳዋፔ ጉዩያን፣ ኡንቲንቱ ማዲና ኢሲፔኔ ባናሳ። ኪሪስቲና አማኑዋባ ባሬ ኤሬዳዋኔ ሄዋ ቃሲ አማኒያ አሳይ ኦሱዋን ፔሻና ሃናታ ቆንጨሲዳ ፃፊዳ። ጳውሎሳ ቆፋይ ኩሜንላ ሃናታን ቤቲያዌ ሃ ኪታና።

ጳውሎስ ሮሜን ዳዲያ አማኒያዋንቱሲ ሳርታ አላዋፔኔ ኡንቲንቱ ዋሳናዋካ ሂዳታ ኢሞዋፔ ጉዩያን፣ ኪታሲ ጊዶ ቆፋይ «ሚሽራቹዋ ቃላይ ያሳይ አሳ ያሊሲያዌ፣ ኮይሩዋፔ ወርሴላ ጋካናው አማኑዋና ጊዲያዋ ኦዳ» (1:17)

ሄዋፔ ጉዩያን ጳውሎስ ሃ ቆፋ አሲዳ ፃፊ። አዩሁዳቱዋ ጊዲናካ አዩሁዳ ጊዳና አሳ ጊዲናካ ኡባይ ናጋራው ዋዳቲያዋንታ ጊዲያ ዲራው፣ ኡንቲንቱ ያሳና ሲጌታናው ኮሼ። አሳይ ያሳና ሲጌታናው ዳንዳዩያዌ ዩሱሲ ኪሪስቲቶሳን አማኒያዋና። ያሳና ሜዲያ ኦራላ ኢቲፔቲላ አይፊ ኦራላ ዳዑዋ ጊዲያዋ ጳውሎስ አሲዳ ኦዳዳ። አማኒያ አሳይ ያሳና ሳሮ ዳዑ። ቃሲ ያሳ አያና ባጋና ናጋራኔ ሃይቁዋ ዋልቃፔ ቢሌፔ። ጳውሎስ ያሳ ቆፋይኔ አማኒያ አሳ ዳዑዋ ጊዶን ኦሊያ ያሳ አያና ዋልቃ ቆፋይ አዩንቶ ኦዳ (5-8)። ሄዋፔ ካሊዳ ቃሲ ጳውሎስ፣ «ያሳይ አሳ ናናሲ ቆፔዳ ቆፋ ጊዶን አዩሁዳቲኔ አዩሁዳ ጊዳና አሳቱ ዋኒዳ ኢቲፔ ዋዳታናው ዳንዳያናዋንቲሻ?» ያጊያ ኦሻ ዛራናው ባዌቲዳ ዳዑ።

ቃሲካ ጳውሎስ፣ አዩሁዳቱ ዩሱሳ አከናን አጌዳዌ ያሳ ቆፋ ጊዲያዋ ኦዳ። አዩሲ ጎፔ፣ ሃዋ ማላ ሃናታን አሳ ዜሬላይ ኡባይ ያሳይ ዩሱሳ ባጋና ቆንጨሴዳ አዶ ኬካቲላን ኢቲፔቲላ ኦላናሳ። ጊዶሽን፣ አዩሁዳቱ ዩሱሳ አካናው ዋዲ ያናዋ ጳውሎስ አማኔ። ወርሴላን ጳውሎስ ኪሪስቲና ዳዑዋ ዋኒዳ ዳዳናው ቤሲንቶ ኦዳ። ያሳሲ ኦላናባ፣ አማኒያ አሳቱ ባሬንቱ ጋዲያሲኔ ባሬንቱ

ጊደን ኢቱ ኢቱዋሲ ሲቁዋኒኔ ማታን ኦፋናባኔ ቆፋ ጋሱዋን ዴንዲያ ኦቫቱዋባ ቆንጨሲዴ ኦዴ።

ሼምፓቱዋ ኡባቱዋሲ አሜቴዳ ቃንፋ ቆፋቱዋ

ሮሜ ኪታ ሁጴ ቆፋ ጌሉዋ (1:1-17)

አቶቴላይ አሳው ኮሺያዋ ጊዲያዋ (1:18-3:20)

ዖሳ አሹዋ ኦጊያ (3:21-4:25)

ዬሱሳን ቤቲያ ኦራሳ ዴዑዋ (5:1-8:39)

ኢሰራዔሊያ አሳው ዴዒያ ዖሳ ቆፋ (9:1-11:36)

ኪሪሰቲናሲ ቤሲያ ኦሱዋ (12:1-15:13)

ዉርሴሳ ቆፋኔ ሳርታ (15:14-16:27)

1 ባሬ ሚሺራቹዋ ቃላ ኦዳናው ዖሳይ ዶሪዴ ዪሴዳ ኪሪሰቶሳ ዬሱሳ ቆማይ፣ ዬሱሲ ኪሪሰቶሲ ኪቴዳ ጳዉሎሲ፣ ታኒ ሃ ዳቢዳቢያ ፃፋይ።

2 ዖሳይ ዳሮ ዋይፔ ካሴ ባሬ ናባቱዋ ባጋና ሚሺራቹዋ ቃላ አማና ያጌዳዊ ዖሳ ጌሻ ማፃፋቱዋን ፃፊቴዳ፤ 3 ሄ ሚሺራቹዋ ቃላይ አሳ ጊዲዴ ዳዊቴ ዛሪያፔ ዬሌቴዳ ዖሳ ናዓ፣ ኦ ጎዳ ዬሱሲ ኪሪሰቶሳባ። 4 ቃሲ ኢ ባሬ ጌሻ አያናን * ሃይቁዋፔ ዴንዴዳዋን፣ ዖሳ ናዓ ጊዲያዋ ዋልቃማ ዋልቃን ቤሴዳ። 5 አዪሁዳ ጊዴና አሳይ ኡባይ አማናናዲኒኔ አዛዜታናዳን፣ ኦኒ ኡንቱንታ ካሌፋና ማላ፣ ዖሳይ ኪሪሰቶሳ ሱንፋ ዲራው፣ ኪሪሰቶሳ ባጋና አጾ ኬካቴላኔ ዬሱሲ ኪቴዳዋንታ ጊዲያ ማታ ኦሲ አሜዳ። 6 ዬሱሲ ኪሪሰቶሳዋ ጊዳናዳን፣ ዖሳይ ዪሴዳ ሂንቴንቱካ ሄዋንቱ ጊደን ዴዒታ።

7 ዖሳይ ሲቁያዋንቶኔ ጌሻባ ኦፋናው ዪሴዳ ሮሜ ጋዲያን ዴዒያ ኡባቶ ዖሳ ኦ አዉዋፔኔ ጎዳ ዬሱሲ ኪሪሰቶሳፔ አጾ ኬካቴላይኔ ሳርቴላይ ሂንቴንቶ ጊደ።

ጋላታ ዋሳ

8 ካሴታዴ ታኒ ሂንቴንቱ አማኦ ሳዓ ኡባን ሲሴቴዳ ዲራው፣ ዬሱሲ ኪሪሰቶሳ ባጋና ሂንቴንቶ ታኒ ዖሳ ጋላታይ። 9-10 አዪሲ ጎፔ፣ ታኒ ኡባ ዋይ ታ ዋሳን ሂንቴንታ ሃሳዪሲያዎ፣ ዖሳይ፣ ታኒ አ ናዓ ሚሺራቹዋ ቃላ ኡዲያዋን ታ አያናን አው ኦሊያዌ ማርካ። ዖሳይ፣ ባሬ ሼኒያን፣ ታኒ ሃዒ ሂንቴንቱኮ ባናው ታ ኦጊያ ሚኮያናዳን፣ ኡባ ዋይ ዋሳይ። 11 አዪሲ ጎፔ፣ ታኒ ሂንቴንታ ሚኒሳናው፣ ሂንቴንቱና ኢቲፔ አያና ኢዋታ ሻካና ማላ፣ ሂንቴንታ

* 1:4 ባሬ ጌሻ አያናን፣ ዋይ «አኒ ዴዒያ ጌሻ አያና»

ቤዓናው ላሞታይ። 12 ታኒ ጊያዌ፣ ሂንቴንቴካ ታካ ኢቲ ዋዴ ሚኔታና። ሂንቴንቴ ታ ኣማኑዋን፣ ቃሲ ታኒካ ሂንቴ ኣማኑዋን ሚኔታና።

13 ታናዳን ኣማኒያዋንቶ፣ ታኒ ኡባ ዋዴ ሂንቴንቴኮ ባናው ቆፓዲ። ሺን ታና ዲጊያባይ ዴዲያዋ ሂንቴ ኤራናው ቤሴ፤ ታኒ ሃራይ ኣቶ ኣዪሁዳ ጊዴና ሃራ ኣሳፔካ ኣይፊያ ዴሚዳዋዳን፣ ሂንቴንቴፔካ ኣይፊያ ዴማናው ኮያይ። 14 ታኒ ኣሳ ኡባው፣ ጊሪኬ ኣሳዉኔ ታማሪቤና ኣሳው ቃሲ ኣቶ ኤራንቻቶኔ ኤያቶ ቃንፃና ኣጩ ዴዔ።

15 ሄዋ ዲራው፣ ታው ዳንዳዬቴዳ ከናን ሮሜን ዴዲያ ሂንቴንቴሲካ ሚሺራቸዋ ቃላ ኦዳናው ኣሞታይ።

ሚሺራቸዋ ቃላይ ያሳ ዋልቃ

16 ሚሺራቸዋ ቃላይ ታና ዬላዬና፤ ኢ ኣማኒያ ኡባ፣ ካሴቲዴ ኣዪሁዳ ኣሳ ቃሲ ኣዪሁዳ ጊዴና ኣሳ ኣሻናው ያሳፔ ዪያ ዋልቃ።

17 ኣዪሲ ጎፔ፣ ያሳ ማፃፋይ፣ «ዲሉ ያሳን ኣማኔቲዴ ዴዓና» ያጊያዋዳን፣ ያሳይ ኣሳ ኮይሮፔ ዉርሴፋ ጋካናው፣ ኣማኑዋን ዪሊሲያዋ ሚሺራቸዋ ቃላይ ቆንጨሴ።

ኣሳ ኢታ ኦሱዋ

18 ቱማቴላይ ኤሬታናዋ ባሬንቴ ኢታ ሃናታን ዲጊያ ናጋራ ኦሱዋ ኡባ ቦላኒኔ ኣሳ ኢታ ኦሱዋ ኡባ ቦላን፣ ያሳ ሃንቁ ሳሉዋፔ ዋዴዴ ቆንጨና። 19 ኡንቴንቴ ያሳባ ኤራና ዳንዳዪያዌ ኡንቴንቶ ቆንጨ፤ ኣዪሲ ጎፔ፣ ያሳይ ኡንቴንቶ ቆንጨሴዳ። 20 ቤቴና ኣ ሃናታይ፣ ሄዌካ ኣ ሜዲና ዋልቃይኔ ኣ ያሳቴላይ ኢቲፔ ያሳይ ሃ ኣላሚያ ሜዴዳዋፔ ደሚዴ፣ ኡንቴንቶ ቆንጨዴ ቤቴዳ፤ ኡንቴንቴ ሄዋ ያሳይ ሜዴዳባፔ ቤዓናው ዳንዳዪያ ዲራው፣ ኡንቴንቶ ጋሶዪያባይ ባዋ።

21 ኣዪሲ ጎፔ፣ ኡንቴንቴ ያሳ ኤሮፔካ፣ ኣው ቤሲያ ቦንቸዋ ኣሚቤይኪና፤ ቃሲ ኣ ጋላቲኪና። ሺን ኡንቴንቴ ኣላሌ ኬሴናባ ቆፒና፤ ቃሲ ኡንቴንቴ ኣኬከና ዋዛናይ ቋሜዳ።

22 ኡንቴንቴ ባሬንታ ኣዴዳ ኤራንቻ ጊኖ፤ ሺን ኡንቴንቴ ኤያ።

23 ኡንቴንቴ ሃይቁና ያሳሲ ጎዪኒያዋ ኢዲዴ፣ ሃይቁያ ኣሳ ሜዴታ፣ ካፋቱዋ ሜዴታ፣ ደዓቱዋ ሜዴታኔ ቲራን ጎሹቲያዋንቴ ሜዴታ ሜዴቲዳዋንቴሲ ጎዪኔዲና።

24 ሄዋ ዲራው፣ ኡንቴንቴ ኢቱ ኢቱዋና ፖኮባ ኦላና ማላ፣ ያሳይ ኡንቴንቴ ዋዛናይ ኣሞቲያ ቱናባ ኦላናዳን ኡንቴንታ ኣጌዳ።

25 አዲስ ጎጥ፡ ኡንቲንቲ ያሳ ቱማቲላ ዋርዲዋን ላሜዲኖ፤ ቃሲ ሜዴዲ ያሳ አጊዴ፡ ኢ ሜዴዲባው ጎዩኔዲኖኔ ኦሌዲኖ። ያሳይ ሜዲኖው ጋላቲቲዳዋ። አሜንዲ።

26 ሄዋ ዲራው፡ ያሳይ ኡንቲንቲ ፖኮባ አዋታና ማለ፡ ኡንቲንታ አጌዳ፤ ሃራይ አቶ ኡንቲንቲ ማጫዋንቲ ባሬንቶ ቤሲያዋ አጊዴ፡ ቤሲናዋ ሃኔዲኖ። 27 ሃዋዳንካ፡ አቲማ አሳይ ቃሲ ባሬንቶ ቤሲያዋዳን ማጫዋንቲና ጋኬቲያዋ አጊዴ፡ ኢቲ ኢቲዋና ጋኬታናው ኮዬዲኖ፤ አቲማ አሳይ ኢቲ ኢቲዋና ፖኮባ ኦሌዴ፡ ባሬንቲ ኦሌዳ ባላን ባሬንቶ ቤሲያ ፒርዳ አኩዲኖ።

28 ኡንቲንቲ ያሳ ኤራናው ደሴናን ኢዳዳዋ ከና ያሳይ ኡንቲንቲ ቤሲናዋ ኦላና ማለ፡ ኡንቲንቶ ፓሌና ቆፋ አሜዲ። 29 ኡንቲንቲን ቲናቲላይ፡ ኢታቲላይ፡ ዮራቲላይኔ ኢታ ሃኖታይ ኩሜዳ፤ ቃሲ ኡንቲንቲን ቃናቲ፡ ሸምቸዋ ዋዲያ ቆፋይ፡ ፓሉማይ፡ ጨሙሳይኔ ኢታ ቆፋይ ኩሜዳ፤ ቃሲ ኡንቲንቲ ሶቂያዋንታ፡ 30 ዚጊሪያዋንታ፡ ያሳ ኢዳያዋንታ፡ ቦሪያዋንታ፡ ኦቶሪቲያዋንታ፡ ጨቁቲያዋንታ፡ ኢታባ ኦላናው ኮዩያዋንታኔ ባሬንቲ አዎኔ አቲው አዛዜቲናዋንታ፡ 31 ቆፋይ ባይናዋንታ፡ አማኑ ባይናዋንታ፡ ሃራንቶ ቃሪቲናዋንታኔ ማሪናዋንታ። 32 ኡንቲንቲ ሃዋንቲ ማላ ኦሌያዋንቲሲ ሃይቁ ቤሲ ጊያ ያሳ ሂጊያ ኤሪዴ፡ ሃዋንታ ኦሌኖ፤ ሄዋ ፃላላ ጊዴናን፡ ሃዋንታ ኦሌያዋንታካ ኦሌቲ ጊዴ ሚኒሲኖ።

2

ያሳ ፒርዳ

1 ሄዋ ዲራው፡ ኔኖ ሃራንቲ ቦላ ፒርዲያዎ፡ ኔው ጋሶዩያባይ ባዋ፤ አዲስ ጎጥ፡ ኔኒ ሃራንቲ ቦላ ፒርዲዳ፡ ሄ ኔኒ ኡንቲንቲ ቦላ ፒርዲያዋ ማላ ኡደፔ፡ ኔ ቦላ ፒርዲሳ። 2 ኦኒ ሃዋ ማላ ኦሱዋ ኦሌያዋንቲ ቦላ ያሳይ ዲሎ ፒርዳ ፒርዲያዋ ኤሬቶ። 3 ኔኖ፡ ሃዋ ማላ ኦሱዋ ኦሌያዋንቲ ቦላ ፒርዲያዎ፡ ቃሲ ሄ ኔኒ ፒርዲያዋ ማላ ኦሌያዎ፡ ኔኒ ያሳ ፒርዲፔ አቲያዋ ማላቲ? 4 ዋይ ያሳ ዋልቃማ ከካቲላ፡ ጌንጩዋኔ ዳንዲያ ካቶዩሻ? ያሳይ ኔና ናጋራፔ ዛራናው ኮዩያ ዲራው፡ ኢ ከካ ጊዲያዋ ኔኒ ኤራሳ።

5 ሺን ሂንቲንቶ ጉዙማ ዋዛናይኔ ናጋራፔ ሲሜና ዋዛናይ ዴዴ፤ ሄዋ ዲራው፡ ያሳ ሃንቁኔ ዲሎ ፒርዲይ ቆንጪያ ጋላሲ፡ ኔኒ ኔ ቦላ ሃንቁዋ ካሴዋፔ ደሪሳሳ። 6 ያሳይ አሳ ኡባው አ ኦሱዋ ማላ ኢማናዎ። 7 ኢቲ ኢቲ አሳቲ ሎዶባ ዳንዲያን ኦሌኖ፤ ቃሲ ጋላታ፡ ቦንቹዋኔ ባዬና ዴዑዋ ኮዩኖ፤ ኡንቲንቶ ያሳይ ሜዲና ዴዑዋ

2:6 ማዝ 62:12፤ ለም 24:12

ኢማና። 8 ሺን ሃራንቱ ኢታባ ኦላናው ያሬቲኖኔ ቱማቲላ ኢዲኖ፤ ያሳይ ኡንቱንቱ ቦላ ባሻኔ ሃንቁዋ ዬዳና። 9 ኢታባ ኦሊያ ኣሳይ ኡባይ ማቶታናኔ ዋዬታና፤ ሄዌ ካሴቲዳ፣ ኣዪሁዳ ኣሳ ጋካና፤ ሄዋፔ ቃሲ ኣዪሁዳ ጊዳና ኣሳ ጋካና። 10 ሺን ያሳይ ሎዎ ኦሱዋ ኦሊያ ኡባቶ ጋላታ፣ ቦንቹዋኔ ሳርቲላ ኢማና። ካሴቲዳ ኣዪሁዳቶ ኢማና፤ ሄዋፔ ቃሲ ኣዪሁዳ ጊዳናዋንቶ ኢማና። 11 ኣዪሲ ጎፔ፣ ያሳ ኣዪፊያን ኣሳይ ኡባይ ኢቲ ማላ።

12 ሙሴ ሂጊ ባይናን ናጋራ ኦሌዳ ኡባይ ሂጊ ባይናን ጳያና። ሙሴ ሂጊ ዴዲሺን፣ ናጋራ ኦሌዳ ኡባይ ሂጊያን ፒርዳታና። 13 ኣዪሲ ጎፔ፣ ያሳ ሲንላን ሂጊያ ናጊያዋንቱ ዲሊኖፔ ኦቲን፣ ሂጊያ ሲሲያዋንቱ ዲሊኪኖ። 14 ኣዪሁዳ ጊዳና ኣሳው ሂጊ ባዋ፤ ሺን ባሬንቱ ቲላ ቆፋን ሂጊ ኣዛዚያዋ ኦሊኖ፤ ኡንቱንቶ ሂጊ ጳዮፔካ፣ ኡንቱንቱ ባሬንቱ ሁጺው ሂጊ። 15 ሂጊ ኣዛዚያዌ ኡንቱንቱ ዋዛና ጊዶን ፃፊቲዳዋ ኡንቱንቱ ሃናታይ ቤሴ፤ ኢቲ ካላ ኡንቱንቱ ቲላ ቆፋይ ኡንቱንቶ ማርካቲያ ዲራውኔ ቃሲ ኢቲ ኢቲ ካላ ኡንቱንቱ ቆፋይ ኡንቱንታ ሞቲያ ዲራው፣ ዋይ ቃሲ ኡንቱንቱና ጋዳቲያ ዲራው፣ ሄዌ ቱማ ጊዲያዋ ኤሪሴ። 16 ታኒ ታማሪሴዳ ሚሺራቹዋ ቃላዳን፣ ኣሳ ዋዛናን ጌሜዳ ቆፋ ያሳይ ዬሱሲ ኪሪሰቶሳ ባጋና ሃዋዳን ፒርዳና።

ኣዪሁዳቱዋኔ ሙሴ ሂጊያ

17 ሺን ኔኒ ኔና ኣዪሁዳ ጋሳ፤ ሂጊያን ዜምፓዳ ያሳን ጨቁታሳ። 18 ኔኒ ኦላና ማላ፣ ያሳይ ኮዪያዌ ኣዬንቶ ኤራ፤ ቃሲ ቱማ ጊዲያዋ ደራናው ሂጊያፔ ታማራዳ። 19-20 ኔኒ ቆቃቱዋ ካሌሊያዋ፣ ቃሲ ጳማኒ ዴዲያዋንቶካ ፖሲሲያዋ፣ ኤሬናዋንታ ኤሪሲያዋኔ ናናቱዋ ታማሪሲያዋ ጊዲያዋ ኤራዲ፤ ሂጊያፔ ኔኒ ኩሚንላ ኤራቲላኔ ቱማቲላ ዴሚያዋ ኤራሳ። 21 ያቲና፣ ኔኒ ሃራቱዋ ታማሪሲያዌ ኔና ኔ ሁጺው ኣዪሲ ታማሪሲኪ? ኔኒ፣ «ወዖፓ» ያጋዳ ቃላ ኦዳሳ። ሺን ኔኒ ኔ ሁጺው ወዳዬ? 22 ኔኒ፣ «ዋሹዋፓ» ያጋ። ሺን ኔኒ ኔ ሁጺው ዋሹማይ? ኔኒ ኤቃ ሸኔታ። ሺን ኤቃይ ዴዲያ ጎሊያ ቦንቃይ? 23 ያሳ ሂጊ ኔው ዴዲያ ዲራው፣ ኔኒ ጨቁታሳ፤ ሺን ሄ ሂጊያ ሚንሳዳ ያሳ ዬላያይ? 24 ኣዪሲ ጎፔ፣ ያሳ ማፃፋይ፣ «ኣዪሁዳ ኣሳቶ፣ ሂንቱ ጋሱዋን ኣዪሁዳ ጊዳና ኣሳቱዋ ጊዶን ያሳ ሱንሳይ ባዬ» ያጌ።

25 ኔኒ ሂጊው ኣዛዜቶፔ፣ ኔ ቃፃራይ ማዲዋና ዴዴ፤ ሺን ኔኒ ሂጊያ ሚንሳፔ፣ ኔኒ ቃፃሬቲዳዌ ቃፃሬቲቤናዋዳን ፓይዳቲ። 26 ኣዪሁዳ ጊዳና ኣሳይ ቃፃሬቲናን ሂጊ ኣዛዚያዋ ናጎፔ፣ ያሳይ ኣ

2:11 ዛር 10:17 2:24 ኢሳ 52:5

ቃፃሬቱዳዋዳን ፓይዴኔ? 27 ሂንቴንቱ፣ አዪሁዳ አሳቱ፣ ሂንቴንቶ ፃፊቱዳ ሂጊ ዴፖፕካ ቃሲ ሂንቴ ቃፃሬቶፕካ፣ ሂጊያ ሂንቴ ማንሴያ ዲራው፣ አዪሁዳ ጊዴና አሳይ ቦላ ቃፃሬታና ቆዮፕካ፣ ሂጊው አዛዘቲዴ፣ ሂንቴ ቦላ ፒርዳና።

28 አዪሲ ጎፔ፣ አዪሁዳ አሳ ማላቲያ ኡባይ ቱሙ አዪሁዳ አሳ ጊዴና፤ ቃሲ አሳይ ባሬ አሹዋ አሳቴላ ቃፃሬቱዳ ዲራው፣ ቱሙ አዪሁዳ አሳ ጊዴና። 29 ሺን ቱሙ አዪሁዳ አሳ ጊያ ኡራይ ጋርሳ ባጋና አዪሁዳ አሳ * ጊዴዳዋ፤ ቃፃሬቲያዋ ያሳ አያናን ኦሴቲያ ዋዛና ቃፃሬፔ አቲን፣ ፃፊቱዳ ሂጊያና ጊዴና፤ ሄ ኡራይ ባሬ ጋላታ ያሳፔ አኪያዋፔ አቲን፣ አሳፔ አኪቤና።

3

አዪሁዳቱ አማኔናን አጉሳን ባዪዜዲኖ

1 ያቲና፣ አዪሁዳ አሳቱ አያኒ አዪሁዳ ጊዴና አሳፔ አጲኖ? ዋይ ቃፃሬቲያዋን አይ ማዲ ዴዒ? 2 ሃዌ አዪሁዳቱዋ ኡባባኒ ሎይሴ ማዴ፤ ኡባባፔ ካሴ ያሳይ ባሬ ኪታ ሃዳራ አዪሁዳቶ ኢሜዳ።

3 ያቲና ኡንቱንቱፔ ኢቱ ኢቱ አማኔቲናዋ ጊደፔ፣ ዋኒ? ሃዋ ዲራው፣ ያሳይ አማኔቲና ያጊያዌ? 4 ሃዋ ጊዴና፤ አሳይ ኡባይ ዋርዳንቻ ጊደፕካ፣ ያሳይ ጊያዌ ቱማ ጊዳናው ቤሴ። ያሳ ማፃፋይ፣ «ኔኒ ሃሳዪያ ዋዴ፣ ኔኒ ዲሎ ጊዲያዋ ኤሪሳናው ኮሼ፤ ኔኒ ሞቲቲያ ዋዴ፣ ሻቲማናው ቤሴ» ያጌ።

5 ሺን ኑ ባዪዙ ያሳ ዲሎ ኦሱዋ ኤሪሲንቶ፣ ኑኒ ዋጋኔ? ኑ ቦላ ሃንቁዋ አሂያ ያሳይ ባዪዛንቼ? ታኒ አሳይ ጊያዋዳን ጋይ። 6 ሃዌ ዋዪ ሃናና። አዪሲ ጎፔ፣ ሃዋዳን ጊደፔ፣ ያሳይ ሃ አላሚያ ቦላ ዋቲ ፒርዳኔ?

7 ሺን ታ ዋርዲዋን ያሳ ቱማቴሳይ አ ቦንቾ ዳርፔ፣ ያቲና፣ ሃዋ ጋካናው አዪሲ ታ ቦላ ናጋራንቻዳን ፒርዲ? 8 ያቲና ኑኒ፣ «ሎዑ ያናዳን፣ አኔ ኢታባ አላይቱ» አዪሲ ጎኩ? ኢቲ ኢቲ አሳይ ሃዋ ታና ሞቲዴ ቦራዲኖ፤ ኡንቱንቱ ያሳፔ ቤሲያ ፒርዳ አካና።

አሳይ ኡባይ ናጋራንቻ

9 ሃዋ ዲራው፣ ኑኒ ዋጋኔ? ኑኒ አዪሁዳቱ፣ አዪሁዳ ጊዴና አሳፔ ዳሬቶ? ሃዋ ጊዴና፤ አዪሲ ጎፔ፣ አዪሁዳቱካ አዪሁዳ

* 2:29 አዪሁዳ ጉሳይ ጋላቲያዋ ጊዲዴ ሱጎሳይ ዪሁዳፔ ዪዳ። 2:29 ዛር 30:6 3:4 ማዝ 51:4

ጊዳና አሳቱካ ኡባይ ኢቲፔ ናጋራፔ ጋርሳን ዳዲያዋ ታኒ ካሴ ሂንቱንቶ አዳዲ።

10 ያሳ ማፃፋይ ሃዋዳን ያጌ፤

«ዲሎ አሳይ ኢቱኔ ባዋ።

11 አኬኪያ አሳይካ ባዋ፤

ዎይ ያሳ ኮዪያዌካ ባዋ።

12 አሳይ ኡባይ ኦጊያፔ ካሬ ኬሴዲኖ፤

ኡባይ ሙሉካ ማዳናዋ ጊዳዳ።

ሎዎባ ኦሊያ ኦኒኔ ባዋ፤

ሃራይ አቶ ኢቱኔ ባዋ።

13 ኡንቱንቱ ዶናይ ዶያ ዳዲያ ዱፋዋ ማላ።

ባሬንቱ ኢንፃርሳን ዎርዶቱዲኖ።

ኡንቱንቱ ዶናፔ አሳ ዎዲያ ሾሻ

ዪሻ ማላ ሃሳያይ ኬሴ።

14 ኡንቱንቱ ዶናን ሹቃይኔ ጫሞባይ ኩሜዳ።

15 ኡንቱንቱ ሱላ ጉሳናው

ዳሪ ኤሌሊኖ።

16 ባይዙኔ ኮሌላይ

ኡንቱንቱ ቤዳሳን ሃቃኒኔ ቆዬና።

17 ኡንቱንቱ ሳሮቱላ ኦጊያካ ኤሪኪኖ።

18 ቃሲ ያሳው ያዪያባይ

ኡንቱንቱ ቆፋን ባዋ»

ያጌ።

19 አሳ ኡባ ሃሳያ ዲጋና ማላኔ ኩሜንላ ሳዓ ያሳ ፐርዳፔ ጋርሳው አላና ማላ፣ ሂጊያ ጊዶን ኦዴቲዳ ኡባባይ ሂጊያፔ ጋርሳን ዳዲያ አሳው ሃሳዪያዋ ኑኒ ኤሬቶ። 20 ያሳ ሲንላን ኦኒኔ ሂጊ አዛዚያዋ ኦሊያዋን ያሌና፤ ሂጊ ኢቲ አሳይ ናጋራ ኦሌዳዋ ኤራናዳን ኡዴ።

አሳይ ያሊያዌ አማኑዋና

21 ሺን ያሳይ አሳ ያሊሲያ ኦጊ ሂጊ ባይናን ሃዲ ቆንጩዳ፤ ሂጊኔ ናባቱ ሄ ያሎቱላባ ማርካቲዲኖ። 22 ያሳይ አሳ ዬሱሲ ከሪሶቶሳ አማኒያዋን ያሊሴ፤ ያሳይ ሄዋ አ አማኒያ ኡባው ኦሌ፤ አይ ሻኮቱላይኔ ባዋ።

23 አዪሲ ጎፔ፣ አሳይ ኡባይ ናጋራ ኦሌዳ፤ ያሳ ቦንቹካ ኡንቱንቶ ጉዳዳ። 24 ሺን ኡንቱንቱ ያሳይ ኢሚያ አ አዶ ኬካቲላን፣ ባሬንታ

3:10 ማዝ 14:1-3 3:13 ማዝ 5:9 3:14 ማዝ 10:7 3:15 አሳ 59:7-8 3:18 ማዝ 36:1 3:20 ማዝ 143:2፤ ጋል 2:16

ዎዚያ ኪሪሰቶስ ዩሱሳ ባጋና ጮ ዓሌዲኖ። 25 ዩሱሳ ሱላን አሳይ ኣ ኣማኒዳ። ባሬ ናጋራው ማሮቴላ ዳማናው። ያሳይ ኣ ኢሜዳ፤ ያሳይ ሄዋ ባሬ ዓሎቴላ ቤሳናው ኦሴዳ፤ ኢ ቤኒ ዎዲያን አሳ ናጋራ ዳንዳዪዳ። ካጲ ባሺ ኣጌዳ፤ ሺን 26 ሃ ዎዲያን ባሬ ዓሎቴላ ቤሳናው አሳ ናጋራ ኣጌና፤ ያሳይ ሄዋ ኦሴያዎን ኢ ባሬ ሁጹው ዓሎ ጊዲያዎን ዩሱሳ ኣማኒያ ኡባ ዓሊሲያዎ ቤሴ።

27 ያተና። ኮኒ ኣያው ጨቁታኔ? ኣይኔ ባዎ። ኣያ ጋሱዎኔ? ኮኒ ሂጌው ኤኖ ጊያዎኔ? ጊዳና፤ ኣማኑዎ ሂጊያና፤ ኣተን።

28 ኣዪሲ ጎፔ። ኣሳይ ኣማኑዎን ዓላና፤ ኣተን። ሂጊ ኣዛዚያዎ ኦሴያዎና ጊዳና ያጊዳ ቆፔቶ።

29 ዎይ ያሳይ ኣዪሁዳቱዎ ዓላላው ያሴ? ኣዪሁዳ ጊዳና ኣሳው ያሳ ጊዳኔ? ቱማ። ኣዪሁዳ ጊዳናዎንቶካ ኢ ቃሲ ያሳ።

30 ኢቲ ያሳ ዓላላይ ዳዔ፤ ኣዪሁዳቱዎ ኡንቱንቱ ኣማኑዎን ኢ ዓሊሳና፤ ቃሲ ኣዪሁዳ ጊዳናዎንታካ ኡንቱንቱ ኣማኑዎን ዓሊሳና።

31 ያተና። ኮኒ ሂጊያ ኣማኑዎን ጋፃ ሱጋኔ? ጊዳና፤ ሂጊያ ማኒሶይቲ፤ ኣተን።

4

ኣብራሃም ኣማኑዎን ዓሌዳ

1 ያተና። ኮኒ ኩሲ ኣሹዎን ዛሬ ጊዲያ ኣብራሃም ኣያ ዳሜዳ ጋኔ? 2 ኣዪሲ ጎፔ። ኣብራሃም ኦሱዎን ዓሌዳዎ ጊዳ፤ ኣው ጨቁቲያባይ ዳዔ፤ ሺን ያሳ ሲንላን ጨቁታና ዳንዳዪና። 3 ኣዪሲ ጎፔ። ያሳ ማፃፋይ ዋጊ? «ኣብራሃም ያሳ ኣማኔዳ፤ ያሳይ ሄዋ ኣው ዓሎቴላን ፓይዳዳ» ያጌ።

4 ኦሴያ ኡራይ ኣኪያ ሚሻ ባሬው ቤሲና ኣኬፔ ኣተን። ኣው ጮ ኣሜቲያዎዳን ፓይዳ፤ 5 ሺን ኦሱዎ ኦሴናን። ናጋራንቻ ዓሊሲያ ያሳ ኣማኒያ ኡራ። ያሳይ ኣ ኣማኑዎን ኣ ዓሊሴ። 6 ሃዎዳንካ። ኣይ ኦሱኔ ባይናን። ያሳይ ዓሎዎዳን ፓይዳዳ ኣሳ ናሹቲያባ ዳዊቲ ሃሳዬዳ ዎዴ ጌዳዌ ሃዎ።

7 «ያሳይ ኡንቱንቱ ባዪዙዎ ኣቶ ጌዳዎንቱ ኡንቱንቱ ናጋራ ካሜዳዎንቱ ኣንጃቲዳዎንታ።

8 ጎዳይ ኣ ናጋራ ፓይዳና ኣሳይ ኣንጃቲዳዎ»

ያጌ።

9 ያተና፣ ሃ ዳዊቲ ሃሳዬዳ አንጂ ቃፃሬቲዳ አሳ ፃላላሴዬ? ዋይ ቃሲ ቃፃሬቲቤና አሳቱዋሴ? ኣዩሲ ጎፔ ኑኒ። «ዶሳ ማፃፋይ፣ ኣብራሃሞ ዶሳ አማኔዳ፤ ዶሳይ ሄዋ አው ዒሎቲላን ፓይዳዳ» ያጌ» ጎይቲ። 10 ያተና፣ ሃዌ አዉዴ ሃኔዴ? ኣብራሃሞ ቃፃሬቲ ሰሚኔዬ? ዋይ ቃፃሬታናፔ ካሴኔ? ቃፃሬታናፔ ካሴናፔ አቲን፣ ቃፃሬቲና ጊዴና።

11 ጉዬፔ ኢ ቃፃሬቲዳ፤ ዶሳይ ኣ አማኑዋ ዲራው። ኢ ቃፃሬታናፔ ካሴ ኣ ዒሎ ኡዴዳዋ ኤሪሳናው። ኣ ቃፃሬይ ማላ ጊዴዳ። ሄዌካ ቃሲ ቃፃሬቲናን ዶሳ አማኒያ ኡባቱዋ ዶሳይ ዒሎ ኦሊዴ ፓይዳናዳን፣ ኡንቲንቶ ኣብራሃሞ አዉዋ ጊዳናሳ። 12 ኢ ቃፃሬቲዳዋንቶካ አዉዋ፤ ጊዳፔካ፣ ኡንቲንቲ ቃፃሬቲዳ ዲራሳ ጊዴና፤ ሺን ኑ አዉዋ ኣብራሃሞ ቃፃሬታናፔ ካሴ አማኒያ አማኑዋ ማላ ካሊያዋንቶካ አዉዋ።

ዶሳይ ኢማና ጌዳባይ አማኑዋን ኣኩቲ

13 ኣብራሃሞሲኔ ኣ ዜሬላው ዶሳይ፣ «ሃ ሳዓ ታኒ ሂንቲንቶ ኢማና» ያጌዳዌ፣ ኣብራሃሞ ዶሳ አማኒዴ ዒሌዳ ዲራሳፔ አቲን፣ ሂጌው ኢ ኣዛዜቲዳ ዲራሳ ጊዴና። 14 ኣዩሲ ጎፔ፣ ሂጌው ኣዛዜቲያዋንቲ ዶሳይ ኢማና ጌዳዋ ላቲያዋንታ ጊዳፔ፣ አሳ አማኑ ማዳናባ ጊዴዳ፤ ዶሳይ ጌዳዌካ ማላ ጊዴዳ፤ 15 ሂጊ ዶሳ ቦሻ ኣሄ፤ ሺን ሂጊ ባይናሳን ሂጊያ ማንሊያባይ ባዋ።

16-17 ሄዋ ዲራው፣ ሂጊያ ናጊያዋንቲ ፃላላው ጊዴናን፣ ቃሲ ኣብራሃሞ አማኔዳዋዳን፣ አማኒያ ኣብራሃሜ ዜሬላ ኡባው ዶሳይ ኢማና ጌዳዌ፣ ዋይታዳን ቱማታናዌ አማኑዋና። ኣብራሃሞ ኑሲ ኡባው አዉዋ። ዶሳ ማፃፋይ፣ «ታኒ ኔና ጮራ ካዉቲላቶ አዋ ኦላዲ» ጊያዋዳን፣ ሃይቄዳዋንቶ ዴዑዋ ኢማያ፣ ባሬ ኣዛዙዋን ባይናባ ዴዒያባዳን ኦሊዴ ዒሲያ፣ ኢ አማኔዳ ዶሳ ሲንላን ኣብራሃሞ ኑሲ ኡባው አዉዋ።

18 ዶሳ ማፃፋይ ኣብራሃሞሲ፣ «ኔ ዜሬላይ ሃዋ ከና ጊዳና» ያጌዳዋዳን፣ ሃዋ ከና ጊዳና ጊዴ፣ ናሼቻን ናጋናው ዳንዳዬና ዋዴ፣ ኣብራሃሞ አማኒዴኔ ሲንላፔ ዴማና ጊዴ፣ ናሼቻን ናጊዴ፣ ጮራ ዜሬላው አዉዋ ጊዴዳ። 19 ሄ ዋዴ፣ ኣብራሃሞ ዬሌቶዴፔ ያቲ ላይላ ኩማና ሃኒያ ጨማ፤ ሺን ባሬ ዳቡራንቻ አሳቲላኔ ሳራ ናዓ ዬላናው ዳንዳዬናዋ ቆፔዳ ዋዴ፣ ኢ ባሬ አማኑዋን ዲቡሪቤና።

4:11 ዶሞ 17:10 4:13 ዶሞ 17:4-6፤ 22:17-18፤ ጋሌ 3:29 4:16-17 ዶሞ 17:5 4:18 ዶሞ 15:5 4:19 ዶሞ 17:17

20-21 ያሳ ኢ ቦንቹዳ፡ አው ኢማና ጌዳ ያሳይ ቃሲ ፖላናው ዳንዳዪያዎ ሎይሴ ኤሪዳ ባሬ አማኑዋን ሚኔዳዋፔ ኣቲን፡ አማኔናን ኢዲዳ፡ ያሳይ ኢማና ጌዳዎ ሲጲቤና። 22 ሄዋ ዲራው፡ ያሳይ ቃሲ ኣ አማኑዋ ዒሎቴላን ፓይዳዳ።

23 «አው ዒሎቴላን ፓይዳዳ» ጊያ ቃላይ ኣ ዓላላው ዓፌቲቤና። 24 ሄ ቃላይ ኑ ጎዳ ዬሱሳ ሃይቁዋፔ ዳንፌዳ ያሳ አማኒያ ኑሲካ ዒሎቴላን ፓይዳታና ማላ ዓፌቲዳ። 25 ያሳይ ኣ ኑ ናጋራ ዲራው፡ ሃይቆ ኣሌዳ ኢማና፡ ኢ ኑና ዒሊሳናው ሃይቁዋፔ ዳንዳዳ።

5

አማኑዋን ቤቲያ ሳርቴላኔ ሲጋቴላ

1 ሄዋ ዲራው፡ ኑኒ አማኑዋን ዒሌዳዋን፡ ኑ ጎዳ ዬሱሲ ኪሪሰቶሳ ባጋና ኑሲ ያሳና ሳርቴላይ ዳዒ፤ 2 ቃሲ ኢ ኑና ሃዒ ኑኒ ዳዒያ ያሳ አጵ ከካቴላ ጊዳ አማኑዋን ኣሄዳ፤ ያቲና፡ ኑኒ ያሳ ቦንቹዋ ቫካናው ኑሲ ዳዒያ ሂደታን ጨቁቴቶ።

3-4 ሄዋ ዓላላ ጊዳና፤ ኑኒ ኑ ዋዪያንካ ናሼቲቶ፤ ኣዪሲ ጎፔ፡ ዋዪያፔ ዳንዳያይ፡ ቃሲ ዳንዳያፔ ፓጨያን ሚኒያዌ፡ ፓጨያን ሚናታፔ ሂደታይ ዪያዎ ኑኒ ኤሬቶ። 5 ያሳይ ኑሲ ኢማዳ ጌሻ ኣያና ባጋና ባሬ ሲቁዎ ኑ ዋዛናን ጉሴዳ ዲራው፡ ሄ ኑኒ ዳማናው ናሼቻን ናጊ ኡቴዳዌ ኑና ዬላዬና።

6 ኣዪሲ ጎፔ፡ ኑኒ ቢር ዎልቃይ ባይናዋንታ ጊዲዳ ዳዒሺን፡ ያሳይ ደሬዳ ዎዲ ጋኪና፡ ኪሪሰቶሲ ናጋራንቻቱዎ ዲራው ሃይቁዳ። 7 ዒሎ ኡራ ዲራው፡ ኢቲ ኡራይ ሃይቃናዌ ዳር ሚቶባ፤ ሺን ሎዎ ኣሳ ዲራው ሃይቃናው፡ «ኤኖ» ጊያ ኡራይ ኦኒ ኤሪ ቤቲናን ኣጌና። 8 ሺን ኑኒ ቢር ናጋራንቻ ጊዲዳ ዳዒሺን፡ ኪሪሰቶሲ ኑ ዲራው ሃይቁዳ፤ ሄዌ ያሳይ ኑና ኣይ ከና ሲቁንቶኔ ኣ ሲቁዎ ኤሪሴ። 9 ሲሚ ኑኒ ሃዒ ኣ ሱላን ዒሌዳዎ ጊደፔ፡ ኣ ባጋና ያሳ ሃንቁዋፔ ኣታና። 10 ኣዪሲ ጎፔ፡ ኑኒ ያሳና ካሴ ዎርኬ፤ ሺን ኣ ናዓ ሃይቁዋን ኣናና ሲጌቲድ። ሄዎፔ ኣሌዳ፡ ሃዒ ኑኒ ያሳና ሲጌቲዳዎፔ ጉዪያን፡ ኢ ፓፃ ጊዲያ ዲራው ኑና ኣሻና። 11 ሺን ሄዎ ዓላላ ጊዳና፤ ሃዒ ኑና ያሳና ሲጌጌዳ ኑ ጎዳ ዬሱሲ ኪሪሰቶሳ ባጋና ኑና ያሳባይ ናሼቹ።

ሃይቁ ኣዳማን ዪና፡ ዳዑ ኪሪሰቶሳን ዬዳ

12 ሄዎ ዲራው፡ ናጋራይ ሃ ሳዓ ኢቲ ኣሳ ባጋና ጌሌዳ፤ ሄ ናጋራይ ባሬናና ሃይቁዎ ኣሄዳ፤ ሄዎ ጋሱዋን፡ ኣሳይ ኡባይ ኣዳማ

ባጋና ናጋራ ኦሴዳ ዲራው፡ ሃይቁ አሳ ዛሪያ ኡባ ጋኬዳ። 13 ሂጊ ኢሜታናፕ ካሴ፡ ሃ አላሚያን ናጋራይ ዴዴ፤ ሺን ሂጊ ባይና ዎዴ ናጋራይ ፓይዳቴና። 14 ሺን አዳማ ዎዲያፕ፡ ሙሴ ዎዲያ ጋካናሲ፡ ሃይቁ አሳ ኡባ ዎዴዳ፤ ሃራይ አቶ አዳሚ ያሳ ሂጌው አዛዘቴናን ኢፄዳዎዳን፡ ናጋራ ኦሴቤናዎንታካ ሃይቁ ዎዴዳ።

አዪሲ ጎፕ፡ አዳሚ ያናዎ ሌሚሱዎ። 15 ሺን ያሳ ኢሞታይ አዳማ ናጋራ ኬና ጊዴና ዲራው፡ ኡንቱንቱ ኢቲ ማላ ጊዲኪኖ፤ ኢቲ ቢታኒያ ናጋራ ዲራው፡ ጮራ አሳይ ሃይቁዳዌ ቱማ፤ ሺን ያሳ አቶ ኬካቴላይ ኦ ኢሞታይ ኢቲ አሳ አቶ ኬካቴላ ባጋና፡ ዩሱሲ ኪሪሰቶሳ አቶ ኬካቴላ ባጋና ጮራ አሳው ዳሬዳ። 16 ያሳ ኢሞታይ ናጋራ ኦሴዳ ቢታኒያ ባጋና ዩዳዎ ማላ ጊዴና፤ አዪሲ ጎፕ፡ አዳሚ ኢቲ ናጋራ ኦሴዳዎፕ ጉዩያን፡ ያሳይ አ ባዪዜዳዎዳን ፒርዳዳ፤ ሺን አሳይ ዳር ናጋራ ኦሴዳዎፕ ጉዩያን ያሳይ፡ «ሂንቱንቱ ባዪዚቤይኪታ» ጊዴ፡ ባሬ አቶ ኬካቴላ ኡንቱንታ ቤሴ። 17 አዪሲ ጎፕ፡ ኢቲ ቢታኒያ ናጋራ ጋሱዎን፡ አ ናጋራ ባጋና፡ ሃይቁ ካወቱዳዌ ቱማ፤ ሺን ኢቲ ኡራይ፡ ዩሱሲ ኪሪሰቶሲ ኦሴዳባይ አይ ኬና ዳሬ፤ ያሳ ዳር አቶ ኬካቴላይ ፂሎቴላ ኢሞታ አኪያ ኡባይ ኪሪሰቶሳ ባጋና ያኒዴ ደባና።

18 ሲሚ ኢቲ ኡራይ ናጋራ ኦሴዳ ጋሱዎን አሳ ኡባ ቦላ ባዪዜዳዎዳን ፒርዳይ ዩዳ። ሃዎዳንካ ኢቲ ኡራይ ፂሎባ ኦሴዳ ጋሱዎን፡ ያሳይ አሳ ኡባ፡ «ባዪዚቤይኪታ» ጊዴ ኡንቱንቶ ደዑዎ ኢሜዳ። 19 አዪሲ ጎፕ፡ ኢቲ ኡራይ አዛዘቴናን ኢፄዳ ጋሱዎን፡ ዳር አሳይ ናጋራንቻ ጊዴዳ፡ ሃዎዳንካ ቃሲ ኢቱ ኤኖ ጌዳዎን ጮራ አሳይ ፂላና።

20 ናጋራ ዳሪሳናው፡ ሂጊ ዩዳ፤ ሺን ናጋራይ ዳሪያ ዎዴ ያሳ አቶ ኬካቴላይ ሎይሲ ዳሬዳ። 21 ናጋራይ ሃይቁዎ ዎልቃን ካወቱዳዎዳን፡ ሃዎዳንካ ቃሲ ያሳ አቶ ኬካቴላይ ፂሎቴላ ዎልቃን ካወቱዳ፡ ኑ ጎዳ ዩሱሲ ኪሪሰቶሳ ባጋና፡ ኑና ሜጲና ዴያ ካሌሌ።

6

ናጋራፕ ሻኬቲዴ ኪሪሰቶሳን ደዑሳ

1 ያቲና፡ ኑኒ ዎጋኔ? ያሳ አቶ ኬካቴላይ ዳራናዳን፡ ናጋራን ሚኒዴ ደባኔ? 2 ጊዴና፤ ኑኒ ናጋራ ኦሴና ማላ ሃይቁዲጌይ። ያቲና፡ ኑኒ ሃዎፕ ሲንላው ዎቲ አ ጊደን ደባኔ? 3 ዎይ ኑኒ ኡባቱ ኪሪሰቶሳ ዩሱሳና ኢቲፕ ጊዳናው፡ ፃማቄቲዳ ዎዴ፡ አ ሃይቁዎንካ አናና ኢቲፕ ጊዳናው ፃማቄቲዳዎ ኤሪኪቴ? 4 ሃዎ ዲራው፡

5:12 ደሞ 3:6

ኪሪስቶስ ባሬ አዉዋ ቦንቾ ዋልቃን ሃይቁዋፔ ዴንዶዋዳን፣ ኮኒካ ኦራላ ዴዑዋ ዴዓናው፣ አ ሃይቁዋ አናና ሻካናው ዊንቃታኒ አናና ኢቲፔ ሞጌቲዶ።

5 አዪሲ ጎፔ፣ ኮኒ ኢ ሃይቁዳዋዳን ሃይቁዳ፣ አናና ኢቲዋ ጊዶፔ፣ ሃዋዳንካ፣ ሃይቁዋፔ ኢ ዴንዶዋዳን ኮኒካ ዴንዲዳ፣ አናና ኢቲዋ ጊዳና። 6 ኮኒ ሃዋፔ ሲንላው ናጋራው አይሌ ጊዴና ማላ፣ ቃሲ ኦ ናጋራንቻ አሳቴላ ዋልቃይ ዳያና ማላ፣ ኦ ኤጫ አሳቴላ ኪሪስቶሳና ማሰቃሊያ ቦላ ሚሲማሪያን ዲሼቲ ካቄቲዳዋ ኤሬቶ። 7 አዪሲ ጎፔ፣ ኢቲ ኡራይ ሃይቁያ ዋዴ ናጋራ ዋልቃይ አ ሞዴና፤ ሺን 8 ኮኒ ኪሪስቶሳና ሃይቁዳዋ ጊዶፔ፣ አናና ቃሲ ዴዓናዋ አማኔቶ። 9 አዪሲ ጎፔ፣ ኪሪስቶስ ሃይቁዋፔ ዴንዴዳዋ፣ ቃሲ ላዒንሉዋ ኢ ሃይቁናዋኔ ሃይቁ ሲንላፔ አ ሞዴናዋ ኮኒ ኤሬቶ። 10 ኢ ኢቲ ካላካ ሃይቁዳ፤ ናጋራው አ ቦላ ዋልቃይ ባዋ፤ ሺን ኢ ሃ ዴዒያ ዴዑዋ ያሳው ዴዒ። 11 ሃዋዳን ቃሲ ሂንቴ ናጋራ ኦሌናዳን፣ ሂንቴንታ ሃይቁዳዋዳን ቆፒቴ፤ ሺን ጎዳ ኪሪስቶሳ ዩሱሳ ባገና ያሳው ሂንቴ ፓዓ ዴዒያዋዳን፣ ሂንቴንታ ቆፒቴ።

12 ሄዋ ዲራው፣ ሂንቴ ሂንቴንቲ አሳቴላ አውዋሲ አዛዜታና ማላ፣ ናጋራይ ሃይቁያ ሂንቴ አሳቴላ ሞዶ። 13 ቃሲ ሂንቴ አሳቴላፔ ኢቲ ሳኔ ኢታ ኦሱዋ ኦላናው ናጋራው ኢሞፒቴ፤ ሺን ሃይቁዋፔ ዴንዴዳ አሳዳን ሂንቴንታ ያሳው ኢሚቴ፤ ቃሲ ሂንቴ ኩሚንላ አሳቴላካ ዊሎ ኦሱዋ ኦላናው ያሳው ኢሚቴ፤ 14 አዪሲ ጎፔ፣ ናጋራይ ሂንቴንታ ሞዳናው ዳንዳዬና፤ ሂንቴ ያሳ አዶ ከካቴላ ጋርሳና ዴዒታፔ ኢቲን፣ ሂጊያፔ ጋርሳና ዴዒኪታ።

ዊሎቴላው አይሌ ጊዲያዋ

15 ያቲና፣ ዋናኔ? ያሳ አዶ ከካቴላ ጋርሳና ዴዒናፔ ኢቲን፣ ሂጊያፔ ጋርሳና ዴዒና ዲራው፣ ናጋራ ኦላኔ? ጊዴና፤ 16 ሂንቴ ሂንቴንታ ኢቲ ኡራው አዛዜታናው፣ አይሊያዳን ኦሊዴ ኢሚያ ዋዴ፣ ሄ ሂንቴንታ አዛዚያዋ አይሌቲዋ ጊዲያዋ ኤሪታ፤ ዋይ ሂንቴ ሂንቴንቶ ሃይቁዋ አሂያ ናጋራው ኤኖ ጌታ፤ ዋይ ሂንቴ ሂንቴንታ ዊሎ ኦሊያ አዛዜ ኤኖ ጌታ። 17 ሺን ያሳው ጋላታይ ጊዶ፤ አዪሲ ጎፔ፣ ናጋራው ካሴ ሂንቴ አይሌ፤ ሺን ጉዬፔ ሂንቴ አኩዳ ቲሚርቲያ ጊዶን ዴዒያ ቲማቴላው ሂንቴ ኩሚንላ ዋዛናፔ አዛዜቲዲታ። 18 ሂንቴንቲ ናጋራ አይሌቴላፔ ከሲዴ፣ ዊሎቴላው አይሌ ጊዴዲታ።

19 ሂንቴንቲ ሜዴታን ዳቡራንቻ ጊዲያ ዲራው፣ ታኒ ኦሲካ ፔሊያ ሃሳያ ሃሳያይ፤ ሂንቴ ካሴ ሂንቴ ኩሚንላ አሳቴላ ናቁዋ ኦላናው፣ ቱናቴላዉኔ ናቆ አይሌ ኡዲዴ ኢሚዲታ፤ ሃዒ ሄዋዳንካ

ሂንቴ ኩሜንላ አሳቴላ ጌሻባ ኦላናው፣ ዲሎቴላው አይሌ ኡዲዳ ኢሚቴ።

20 ሂንቴንቱ ናጋራው አይሌቲዳ ዳዲያ ዎዴ፣ ዲሎቴላይ ሂንቴንቶ ጎዳ ገደና። 21 ሂንቴንታ ሃዲ ዩላዪያ ዩዋቱዋ ሄ ዎዴ ኦሌዳዋፕ አይ ማዲዋ ዳሜዲቲ? አዪሲ ጎፕ፣ ሄ ዩዋቱዋ ወርሴላይ ሃይቁዋ። 22 ሺን ናጋራ አይሌቴላፕ ሂንቴ ኬሲዳ፣ ያሳው ኤናፕዲታ፤ ቃሲ ሂንቴ ኦሊያ ኡባባሲ ሂንቴንታ ኡባካ አው አሊዳ አሜዲታ። ሄዌ ሂንቴንቶ ዎሪ፤ ሄዋ ወርሴላይ ሜጲና ዳዑዋ። 23 አዪሲ ጎፕ፣ ናጋራ ጋቲ ሃይቁዋ። ሺን ያሳይ ኑ ጎዳ ኪሪሰቶሳ ዩሱሳ ባጋና ኢሚያ አሞታይ ሜጲና ዳዑዋ።

7

ሙሴ ሂጊያ ቃሹዋፕ ቢሌቲያዋ

1 ታናዳን አማኒያዋንቶ፣ ሂንቴንቱ ኡባይ ሂጊያ ኤሪያ ዲራው፣ ታኒ ጊያዋ ሎይሊ ኤሪታ፤ ሂጊ ኢቲ አሳይ ገፃ ዳዔዳ ዎዴ ፃላላን አ ዋዴ። 2 አዪሲ ጎፕ፣ አሲና ጌሌዳ ሚሺራታ ኢዚ አሲናይ ገፃ ዳዔዳ ከናን፣ ሂጊያን አናና ቃሹታ ኡታዳ፤ ሺን ኢዚ አሲናይ ሃይቆፕ፣ አናና ጫቄዳ ሂጊ ኢዘ ዋዴና። 3 ሄዋ ዲራው፣ ኢዘ ባሬ አሲናይ ገፃ ዳዲሺን፣ ሃራ አቲማዋ ጌሎፕ፣ አሳይ ኢዘ፣ «ዎሹሜወና» ጋና። ሺን ኢዚ አሲናይ ሃይቆፕ፣ ሂጊ ኢዘ ዋዴና፤ ኢዘ ሃራ አሲና ጌሎፕኔ ኢዘ ኦኒኔ፣ «ዎሹሜወና» ጌና።

4 ታናዳን አማኒያዋንቶ፣ ሄዋዳን ሂንቴንቱ ቃሲ ኪሪሰቶሳ አሳቴላፕ ኢቲ ባጋ ጊዲያ ዲራው፣ ሂንቴንቱ አባጋና ሃይቁዲታ። ቃሲ ኦኒ ያሳ ማዲያ ኦሱዋ አላና ማላ፣ ሂንቴንቱ ያሳይ ሃይቁዋፕ ዳንጱዳ ኪሪሰቶሳዋንታ። 5 አዪሲ ጎፕ፣ ኦኒ ኑ አሳቴላይ ኮዬዳዋዳን ዳዲያ ዎዴ፣ ሂጊ ኦኒ ናጋራ ኦላናዳን፣ ኦና ዳንጱሌ፤ ኑ አሳቴላ ጊዳን ኢታ አሙ ዳዲያ ዲራው፣ ኦኒ ሃይቆ አይፊያ አይፊዳ። 6 ሺን ሃዲ ኦኒ ኦና ቃቹዳዋ ሃይቁዳ ዲራው፣ ያሳይ ኦና ሂጊያ ቃሹዋፕ ቢሌዳ። ሄዋ ዲራው፣ ኦኒ ጌሻ አያናይ ጊጊሴዳ ኦራሳ ኦጊያን ያሳው ኤና ጋናዋፕ አቲን፣ ፃፊቲዳ ሂጊ ኦሲ ጊጊሴዳ ኤጫ ኦጊያን ኤና ጎኮ።

ሂጊያኔ ናጋራ

7 ያቲና፣ ኦኒ ዋጋኔ? ሂጊ ባሬ ሁጹው ናጋሬ? ሄዋ ገደና፤ ሺን ሂጊ ናጋራይ አዬንቶ ታና ኤሪሴዳ። አዪሲ ጎፕ፣ ታኒ ሂጊ፣ «አሳባ አሞቶፓ» ጊቤኔንቶ፣ አሳባ አሞቲያዌ አዬንቶ ኤሪኬ።

8 ሺን ናጋራይ ታኒ ኡባባ አሞታና ማላ፣ አዛዙባ ባጋና ታ ቦላ ኦጊያ ዳሜዳ፤ አዲሲ ጎፔ፣ ሂጊ ባዌንቶ፣ ናጋራው ዋልቃይ ባሞ።

9 ካሴ ሂጊ ባይና ዋዳ ታኒ ፓፃ፤ ሺን አዛዙ ዬዳ ዋዳ ናጋራይ ዳዎ ሲሚና፣ 10 ታኒ ቃሲ ሃይቃዲ፤ ታና ፓፃ ዋላናው ያሳይ ቆፔዳ አዛዙ፣ ታው ሃይቁዋ አሄዳ። 11 አዲሲ ጎፔ፣ ናጋራይ አዛዙባ ባጋና ታና ጨሚያ ኦጊያ ዳሜዳ፣ ሄ አዛዙባን ታና ዋዴዳ።

12 ሄዋ ዲራው፣ ሂጊ ጌሻ፤ አዛዙካ ጌሻ፣ ዒላኔ ሎዓ።

13 ያተና፣ ሎዖባይ ታው ሃይቁዋ አሄዳ? ሄዋ ጊዳና፤ ሺን ታው ሄዋ ናጋራይ አሄዳ፤ አሳይ ናጋራይ አዬንቶ ሻኪዴ ኤራና ማላ፣ ናጋራይ ሎዖባ ባጋና፣ ታው ሃይቁዋ አሄዳ። ቃሲ አዛዙ፣ «ኦኒኔ ናጋራ ኦላናው ቤሴና» ያጊያ ዲራው፣ ናጋራይ ካሴዋፔ አዲ ኢቲዳ።

አሳ ዳዑባ ጋርሳን ዳዒያ ባዒያ

14 ኦኒ ሂጊ ያሳዋ ጊዲያዋ ኤሬቶ፤ ሺን ታኒ ታና ናጋራው ዘለዒዳ ሃይቁያ አሳ፤ 15 ታኒ ኦሊያዋ ዋዛና አሊኬ፤ አዲሲ ጎፔ፣ ታኒ ኢዒያዋ ኦላይፔ አቲን፣ ታኒ ኦላናው ደሲያዋ ኦሊኬ። 16 ታኒ ኢዒያዋ ኦሊያዋ ጊደፔ፣ ሂጊ ሎዓ ጊዲያዋ ማርካታይ። 17 ሄዋ ጊደፔ፣ ሄ ዬወዋ ታ ቦላ ዳዒያ ናጋራይ ኦሊያዋፔ አቲን፣ ሃዒ ታኒ ኦሊኬ።

18 ታናን፣ ሄዌኔ ታ አሳቲላን ሎዖባይ ዳዒናዋ ታኒ ኤራይ፤ አዲሲ ጎፔ፣ ሎዖባ ኦሊያ አሙ ታ ቦላ ዳዖፔካ፣ ታኒ ሄ ሎዖባ ኦላናናው ዳንዳዬኬ። 19 ታኒ ኢዒያ ኢታባ ኦላይፔ አቲን፣ ታኒ ደሲያ ሎዖባ ኦሊኬ። 20 ሺን ታኒ ኢዒያዋ ኦሊያዋ ጊደፔ፣ ሄዋ ታ ቦላ ዳዒያ ናጋራይ ኦሊያዋፔ አቲን፣ ሃዒ ሄዋ ኦሊያዋ ታና ጊዲኬ።

21 ሲሚ ታኒ ሎዖባ ኦላናው ደሲሺን፣ ኢታባ ኦሊያዋ ታው ሂጊ ጊዲያዋ ዳማዲ። 22 አዲሲ ጎፔ፣ ታኒ ታ ዋዛና ጊደን ያሳ ሂጊያን ናሼታይ፤ 23 ሺን ታ ቦላ ጊደን ዳዒያ ታ ዋዛና ቆፋ ሂጊያን ዋዴቲያ ዳማ ሂጊያ ቤዓይ። ሄ ሂጊ ታ ቦላ ጊደን ዳዒያ ናጋራ ኦሲሲያ ሂጊያን ታና ቃሺሴ። 24 ታኒ አይባ ናሼቺ ባይና አሴ! ታና ሃይቆ አፊያ ሃ አሳቲላፔ አሻናዌ ኦኔ? 25 ኦ ጎዳ ዬሱሲ ኪሪሰቶሳ ባጋና ያሳው ጋላታይ ጊደ።

ሲሚ ታኒ ታ ዋዛና ቆፋን ያሳ ሂጊው ኤኖ ጋይ። ሺን ታ አሳቲላን ታና ናጋራ ኦሲሲያ ሂጊው ኤኖ ጋይ።

8

ጌሻ አያናይ ኮዪያዋዳን ዴቦሳ

1 ሃዋ ዲራው፡ ኪሪሰቶሳ ዩሱሳና ዴቢያዋንቱ ቦላን ፐርዳይ ሃሲ ባዋ፤ 2 አዪሲ ጎፔ፡ ኪሪሰቶሳ ዩሱሳ ባጋና ኑሲ ዴቦቀ አሚያ ጌሻ አያና ሂጊ ታና * ናጋራ ሂጊያ አይሌቴላፔኔ ሃይቁዋ ሂጊያ አይሌቴላፔ ኬሴዳ። 3 አሳ አሳቴላይ ዳቡራንቻ ጊዲያ ዲራው፡ ሂጊ አላናው ዳንዳዪቤናዋ ያሳይ አሌዳ፤ ናጋራንቻቱዋ አሳቴላ ማላ አሳቴላና ዴቢያ ባሬ ናዓ፡ አሳይ አሌዳ ናጋራው ያርሹዋ ጊዳናው ያሳይ ከቲዳ፡ አሳ አሳቴላ ጊዳን ዴቢያ ናጋራ ፐርዳዳ። 4 ጌሻ አያናይ ኮዪያዋዳን ዴቢያዋንቱ ኣቲን፡ ኑ አሳቴላይ ኮዪያዋዳን ዴቢያዋንቱ ቦላ፡ ኑ ቦላ፡ ሂጊያ ዓሎ አዛዙ ፖሊታና ማላ፡ ያሳይ ሃዋ አሌዳ።

5 ባሬንቱ አሳቴላይ ኮዪያዋዳን ዴቢያዋንቱ ባሬንቱ አሳቴላባ ቆፐና፤ ሺን ጌሻ አያናይ ኮዪያዋዳን ዴቢያዋንቱ ጌሻ አያናባ ቆፐና። 6 አሳቴላባ ቆፐሳይ ሃይቁዋ አሄ፤ ሺን ጌሻ አያናባ ቆፐሳይ ዴቦቀኔ ሳርቴላ አሄ። 7 አሳቴላባ ቆፐሳይ ያሳው ኢያ፤ አያው ጎፔ፡ አሳቴላይ ያሳ ሂጌው ኤኖ ጌና፤ ቃሲ ኤኖ ጋናዉካ አው ዳንዳዪቴና። 8 ባሬንቱ አሳቴላው ኤኖ ጊያዋንቱ ያሳ ናሹቻናው ዳንዳይኪኖ።

9 ሺን ያሳ አያናይ ሂንቴንቱን ዴፖፔ፡ ጌሻ አያናይ ጊያዋዳን ዴቢያታፔ ኣቲን፡ ሂንቴ አሳቴላይ ኮዪያዋዳን ዴቢያታ። ሺን ኦኒኔ ኪሪሰቶሳ አያናይ ባይናዋ ጊዳፔ፡ ሄ ኡራይ ኪሪሰቶሳዋ ጊዳና።

10 ሺን ኪሪሰቶሲ ሂንቴንቱን ዴፖፔ፡ ሂንቴ አሳቴላይ ናጋራ ጋሱዋን ሃይቁዳዋ፤ ሺን ሂንቴ አያናይ ዓሎቴላ ጋሱዋን ሂንቴንቱን ፓፃ ዴዔ። 11 ሺን ዩሱሳ ሃይቁዋፔ ዴንሌዳ ያሳ አያናይ ሂንቴ ጊዳን ዴፖፔ፡ ሃይቁዋፔ ኪሪሰቶሳ ዴንሌዳ ያሳይ ቃሲ ሂንቴንቱን ዴቢያ ባሬ ጌሻ አያናን፡ ሃይቁያ ሂንቴ አሳቴላዉካ ዴቦቀ አሚና።

12 ሲሚ ታናዳን አሚኒያዋንቶ፡ ኦኒ አጩዋና ዴዔቶ፤ ኑ አሳቴላይ ኮዪያዋዳን ዴቢያው ኑሲ ቤሴና። 13 አዪሲ ጎፔ፡ ሂንቴ ሂንቴ አሳቴላይ ጊያዋዳን ዴፖፔ፡ ሂንቴ ሃይቃና፤ ሺን ሂንቴ ሂንቴ ናጋራ ኦሱዋ ጌሻ አያናን ዋጶፔ፡ ፓፃ ዴዳና። 14 ያሳ አያናይ ካሌሊያ ኡባቱ ያሳ ናና። 15 አዪሲ ጎፔ፡ ኦኒ ኑ ኮሻ ቆቁ አሊዳ፡ «አባ! ታ አቦ» ያጊዳ ያሲያ፡ ኑና ያሳ ናና ኬሲያ ጌሻ አያና ያሳፔ አኬዶፔ ኣቲን፡ ሳዔሉዋ ያያናው አይሌ ኬሲያ አያና አኪቤይኮ።

* 8:2 ታና፡ ኣቲ ኣቲ ጌሻ ቃላ ቢሌላይ፡ ኔና ዋይ ሂንቴንታ ያጌ፤ ሃራይ ቃይ ኑና ያጌ።

16 የሰ ላያናይ ባሬ ሁጵው ኑ አያናና ጊዲዴ፣ ኑኒ የሰ ናና ጊዲያዎ ማርካቴ። 17 ኑኒ ኣ ናና ጊደፔ፣ ኢ ባሬ ኣሳው ሚንጃዳ ኣንጂዎ ላታና፤ ቃሲ ኑኒ የሰይ ኪሪሰቶሳው ሚንጃዳዎካ ኣናና ላታና፤ ኑኒ ኪሪሰቶሳ ዎዪያ ኣናና ሻኮፔ፣ ኣ ቦንቹዎካ ኣናና ሻካና።

የሰ ናናው ቆንጫናው ዴዲያ ቦንቹዎ

18 ኣዪሲ ጎፔ፣ ኑኒ ሃዲ ዎዬቲያ ዎዪያ ኑሲ ሲንላፔ ቆንጫና ቦንቹዎና ጋላናው፣ ኡባካ ዳንዳዬቴና ጋዴ ታኒ ቆፓይ። 19 የሰይ ሜዴዳ ሜዴታ ኡባይ የሰ ናናይ ቆንጫናዎ ሎይሊ ላዎቲ ኡቴዳ። 20 ኣዪሲ ጎፔ፣ ሜዴታ ኡባይ ማዲ ባይናባ ጊዳናዳን፣ የሰይ ኣ ቦላ ፒርዴዳ፤ ሲንላፔ ዴማና ጊዴ ናሼቻን ናጊ ኡታናዳን ኡዴዳ የሰይ ኮዬዳ ዲራው ሃኔዳፔ ኣቲን፣ ሜዴታ ኡባይ ባሬ ሁጵው ኮዬዳዎን ጊዴና። 21 ሜዴታ ኡባይ ባሬ ሁጵው ባሻ ኣይሌቴላፔ ኢቲ ጋላሲ ኬሳናዎ፤ ቃሲ ሄ ሜዴታቱ የሰ ናናይ ኣይሌቴላፔ ኬሴዳ ቦንቹ ኬሳ ሻካና። 22 ኣዪሲ ጎፔ፣ ሜዴታ ኡባይ ኢቲፔ ሃዎ ጋካናው፣ ማጫ ኣሳ ዬሉ ኦይቁና ኦሊያዎዳን፣ ሳኩዎን ኦሊያዎ ኑኒ ኤሬቶ። 23 ቃሲ ሄዎ ፃላላ ጊዴና፤ ኑኒ፣ ጌሻ ኣያና የሰ ባይራ ኣዎታዳን ኡዲዴ ኣኬዳዎንቱ፣ ኑ ሁጵው ቃሲ የሰይ ኑና ባሬ ናና ኦላናዳኒኔ ኑ ኩሚንላ ኣሳቴላ ዎዛናዳን ናጊዴ፣ ኑ ጊደን ኦሊቶ። 24 ኣዪሲ ጎፔ፣ ኑኒ የሰይ ኢማና ጌዳዎን ኣቴደ። ሺን ኑኒ የሰይ ኢማና ጌዳዎ ቤዖፔ፣ ያቲና፣ ሄዎ ናሼቻን ናጊያዎ ጊዴና፤ ኣዪሲ ጎፔ፣ ባሬ ቤዲያዎ ዴማና ጊዴ፣ ናሼቻን ናጊያዎ ኦኔ? 25 ሺን ኑኒ ቤዲናዎ ዴማና ጊዴ፣ ናሼቻን ናጎፔ፣ ሄዎ ዳንዳዪዴ ናጌቶ።

26 ሃዎዳን ቃሲ ጌሻ ኣያናይ ኑ ዳቡራ ማዳናው ዬ፤ ኣዪሲ ጎፔ፣ ኑኒ የሰ ዎቲ ዎሳናው ቤሲንቶ ኤርኮ፤ ሺን ጌሻ ኣያናይ ባሬ ሁጵው ቃላን ቆንጫሳናው ዳንዳዬቴና ኦሊያን ኑሲ ጋናቴ። 27 ቃሲ ኣሳ ዎዛና ቢዲያ የሰይ፣ ጌሻ ኣያናይ ኢ ኮዪያዎዳን፣ የሰ ናቶ ጋናቲያ ዲራው፣ ጌሻ ኣያና ቆፋይ ኣዬንቶ ኤሬ።

28 የሰይ ባሬና ሲቁያዎንቶ፣ ባሬ ቆፋዳን ፃሴዳዎንቶ፣ ኡባ ዬወዎ ሎዖቴላው ኦሊያዎ ኑኒ ኤሬቶ። 29 የሰይ ባሬ ናዓይ ጮራ ኢሻቱዎ ጊደን ባይራ ጊዳናዳን፣ ኢ ካሴ ኤሬዳዎንታ ቃሲ ባሬ ናዓ ማላታናዳን፣ ካሴቲዴ ቆፋ ቃቹዳ። 30 የሰይ ካሴቲዴ ቆፔዳዎንታ፣ ኡንቱንታ ቃሲ ፃሴዳ፤ ሄ ፃሴዳዎንታካ ጌሼዳ፤ ሄ ጌሼዳዎንታካ ቃሲ ቦንቹዳ።

የሰ ሲቁዎ

31 ያተና፡ ኮኒ ሃዋ ኡባ ዋጋኔ? ያሳይ ኑ ባጋ ጊደፔ፡ ኑና ኮኒ ኡቁታናዊ? 32 ኢ ሃራይ አቶ ባሬ ናባካ ዋዪያፔ ጉዬ አሺቤና፤ ሺን አ ኑሲ ኡባው አሊዳ አሚ አጌዳ። ኢ ባሬ ናባ አሚዳዊ ቃሲ ኑሲ ኡባባ ጮ አሚኔ?

33 ያሳይ ደሬዳዋንታ ኮኔ ሞታናዊ? ያሳይ ባሬ ሁጹው ኡንቱንታ ዪሊሴዳ። 34 ያተና፡ ኡንቱንቱ ቦላ ፒርዳናው ዳንዳዪያዊ ኮኔ? ሄዋ ጎፔ፡ ሃይቁዋፔ ዳንዲዳ፡ ያሳፔ ኡሺቻ ባጋና ኡቱዳ፡ ኪሪሰቶሲ ዬሱሳ፤ ኢ ቃሲ ኑሲ ጋናፔ።

35 ሲሚ ኑና ኪሪሰቶሳ ሲቁዋፔ ሻካናዊ ኮኔ? ዋዪ ዋይ ሜቱ ዋይ ዬዳርሱ ዋይ ኮሻይ ዋይ ካሉ ዋይ ያሻይ ዋይ ኦላይ ኑና ሻካኔ? 36 ያሳ ማፃፋይ፡ «ኮኒ ኔ ዲራው፡ ኡባ ጋላሲ ሃይቁቶ፤ ሹካው አፊያ ደርሳዳን ፓይዳቱቶ» ያጌ። 37 ሺን ኮኒ ኑና ሲቁዳ አኒ ሃ ዬጩዋ ኡባን ኑና ያኒያዋንቱፔ አዲቶ።

38-39 አዪሲ ጎፔ፡ ሃይቁዋ ጊዲና፡ ዴዑዋ፡ ኪታንቻቱዋ ጊዲና፡ ሞዲያዋንታ፡ ሃዲ ዴዲያዋንታ ጊዲና፡ ሲንሳፔ ያናዋ፡ ዋልቃማቱዋ ጊዲና፡ ቦላ ሳሉዋ ጊዲና፡ ጋርሳ ሳባ፡ አይ ሜዴታ ጊዲናካ፡ ኑ ጎዳ ኪሪሰቶሳ ዬሱሳን ዴዲያ ያሳ ሲቁዋፔ ኑና ሻካናው ዳንዳዬናዋ ታኒ ኤራዲ።

9

ያሳይ ካሴ ደሬዳ ኢሰራዔሊያ አሳ

1 ታኒ ቱሙዋ ሃሳያይ፤ ታኒ ኪሪሰቶሳሳ፤ ቃሲ ዋርደቲኬ። ጌሻ አያናይ ሞዲያ ታ ቲላ ዋዛናይ ታኒ ዋርደቲናዋ ታው ማርካቲ። 2-3 ታው አሹዋን ዛሬ ጊዲያ ታናዳን አማኒያዋንቶ፡ ታ ዋዛናን ዳር ቃሬታይኔ አጌና ቆፋይ ዴዔ። አዪሲ ጎፔ፡ ታኒ ታ ሁጹው ኡንቱንቱ ዲራው፡ ያሳ ሺቃፔ ጋርሳና ዴዳሪኪታሻ! ቃሲ ኪሪሰቶሳፔካ ሻኬታሪኪታሻ! 4 ኡንቱንቱ ኢሰራዔሊያ አሳቱዋ፤ ያሳይ ኡንቱንታ ባሬ ናና ኡዲዳ፡ ባሬ ቦንቹዋ ኡንቱንቱና ሻኬዳ። ኡንቱንቱና ቃላ ጌሊዳ፡ ሂጊያ ኡንቱንቶ አሚዳ። ኡንቱንቱ ያሳው ቤሲያ ኦጊያን ጎዪኒኖ፤ ቃሲ ያሳይ አማና ጌዳዋካ አኬዲኖ።

5 ኡንቱንቱ ዜሬላኒ ካሴ አዋቱዋ ዛሬ፤ ቃሲ ኪሪሰቶሳካ አሹዋን ኡንቱንቱ ዛሬ። ኢ፡ ኡባፔ ቦላ ጊዲዳ ሞዲያ፡ ሜዲናው ጋላቲቱዳዊ ያሳ። አሚንዲ።

6 ሺን ታኒ፡ «ያሳይ አማና ጌዳዊ አታና» ያጊኬ። አዪሲ ጎፔ፡ ኢሰራዔሊያ አሳ ኡባቱ ያሳይ ደሬዳዋንታ ጊዲኪኖ። 7 ቃሲ

አብራሃም ዜሬላቱ ኡባቱ ጾሳ ናና ጊዲኪኖ። ጾሳይ አብራሃምሱ። «ኔ ዜሬላይ ዪሳቃ ባጋና ዪሴታና» ያጌዳ። 8 ሄዋ ጉሳይ ኡንቱንቱ ጾሳይ ኢማና ጌዳ ኦጊያን ዩሌቴዳ ናናይ ዛሪያዳን ፓይይታና፤ ሺን አሳ ቆፋዳን ዩሌቴዳዋንቱ ጾሳ ናና ጊዲኪኖ ጉሳ። 9 አዪሲ ጎፔ። ጾሳይ ኢማና ጊዳ ሃሳዬዳዌ ሃዋ፤ «ታኒ ሃ ጌቴቴዳዋዳን ሄዋይ ያና፤ ሳራካ አቱማ ናባ ዩላና» ያጌዳ።

10 ሄዋ ፃላላካ ጊዳና፤ ኢርቢቃ ዩሌዳ ማንቱ ናና አዉ ኢቱዋ፤ ኢካ ኑ አዉዋ ዪሳቃ። 11-12 ሺን ኢቲ ናባ ዶሬዳ ጾሳይ ባሬ ሁጹው ቆፔዳዋ ጊዳናዳን። ጾሳይ ኢርቢቁው። «ባይራይ ቱፋው አዛዜታና» ያጌዳ፤ ኢ ሄዋ ኡንቱንቱ ዩሌታናፔኔ ኢታባ ዋይ ሎዖባ አይኔ አላናፔ ካሴና ጌዳ። ሄዋ ዲራው። ጾሳ ዶሩ አ ዪሴዳዋዳኒፔ አቲን። ኡንቱንቱ ኦሌዳዋና ጊዳና። 13 ጾሳ ማፃፋይ። «ያዪቆባ ሲቃዲ፤ ሺን ኤሳ ኢፃዲ» ያጌ።

14 ያቲና። ኑኒ ዋጋኔ? ጾሳይ ዳሺሲዳ ፒርዲ? ሄዋ ጊዳና። 15 አዪሲ ጎፔ። ሙሴው ኢ።

«ታኒ ማራናው ኮዪያዋንታ ማራና፤ ቃሲ ቃሬታናው ኮዪያዋንቱሲካ ቃሬታና» ያጌዳ። 16 ሲሚ ጾሳይ አሳ ማሪያዌ ኢ ማራናው ኮዪያ ዲራሳፔ አቲን። አሳይ ኮዪያ ዋይ ኦሌያ ዲራሳ ጊዳና።

17 አዪሲ ጎፔ። ጾሳ ማፃፋይ ጊብዪ ካቲያሲ። «ታኒ ታ ዋልቃ ኔናን ቤሳናዉኔ ታ ሱንሳይ አላሚያ ኡባን ኦይታናው። ሄዋሲ ታኒ ኔና ካዉላዲ» ያጌ። 18 ሲሚ ጾሳይ ማራና ኮዪያዋ ማሬ፤ ቃሲ ዋዛና ጎርዳና ኮዪያዋ ዋዛና ጎርዳ።

ጾሳ ሃንቁዋኔ ማርታ

19 ሲሚ ሂንቱ ታና። «ሄዌ ቱማ ጊዶፔ። ጾሳይ አሳ ባዪዙዋሲ አያው ቶሺ? ጾሳይ ጌዳዋ ኢፃዲ ጋናዌ ኦኔ?» ያጋናው ዳንዳዪታ።

20 ሺን ታ ላጌው። ጾሳሲ ዛራናው ኔኒ ኦኔ? ኡርቃፔ ማጴቴዳ ሚሻይ ጉዬ ዛሪዳ ባሪና ማጴዳዋ። «ታና ሃዋዳን አዪሲ ማጴዳ?» ጊዳ ኦቻናው ዳንዳይ? 21 ዋይ ኡርቃ ማጴያዌ ባሬ ማጴያ ኡርቃ ባሬ ኮዪያዋዳን ኦላናዉኔ ኢቲ ማላ ኡርቃፔ ኢቱዋ ቦንቾ ሚሻ ኡዲዳ። ቃሲ ኢቱዋ ቶሼቴዳ ኦሱዋ ኦሌያ ሚሻ ኡዲዳ ማጴናው አው ማቲ ባዌ?

9:7 ዶም 21:12 9:9 ዶም 18:10 9:11-12 ዶም 25:33 9:15 ኬስ 33:19 9:17 ኬስ 9:16 9:20 ኢሳ 29:16፤ 45:9

22 ያሳይ ኦሴዳዌ ሃዋና ኢቱዋ። ኢ ባሬ ሃንቁዋ ቤሳናውኔ ባሬ ዋልቃ ኤሪሳናው ኮዬዳ፤ ኢ ባሬ ሃንቁዋን ፒርዳናዋንታ፡ ባዪዛናው ገሊ ኡቲዳዋንታ፡ ዳሮ ገንጩዋን ዳንዳዬዳ። 23 ቃሲ ኢ ማሬዳዋንቶ፡ ባሬ ቦንቹዋ ኣካናው ገሊሲ ዋሌዳዋንቱሲ ኢ ኣይ ከና ቦንቹቲንቶኔ ቤሳናው ኮዬዳ። 24 ኑኒ ኢ ዌሴዳዋንታ፤ ሺን ኣዪሁዳ ኣሳ ዓላላፔ ጊዴናን፡ ኣዪሁዳ ጊዴና ኣሳ ጊዶፔካ ዌሴዳ።

25 ሆሴዓ ማፃፋን ኢ ጊያዌ ሃዋ፤
 «ታ ኣሳ ጊዴናዋንታ፡
 «ታ ኣሳ» ጋዴ ዌሳና።
 ታኒ ሲቃቤና ዛሪያካ፡
 «ታ ሲቃቶ» ጋዴ ዌሳና።

26 «ሂንቱንቱ ታ ኣሳ ጊዲኪታ» ጊያዋ
 ኡንቱንቱ ሲሴዳ ሄ ሳዓን፡
 ኡንቱንቱ፡ «ዳዑዋ ያሳ ናና» ጌቲቲዴ ዌሴታናዋንታ»
 ያጌ። 27 ኢሲያሲ ኢሰራዔሊያ ኣሳባ ያጊዴ ሃሳዬዳ፤
 «ኢሰራዔሊያ ኣሳይ ኣባ ማታን
 ዴዒያ ሻፊያ ከና ጊዶፔካ፡
 ኡንቱንቱፔ ኣማሬዳዋንቱ ዓላላይ ኣታና።

28 ኣዪሲ ጎፔ፡ ጎዳይ ሳዓ ቦላን
 ዴዒያ ኣሳ ኡባ ቦላ
 ኤሌካ ፒርዳና»

ያጌዳ። 29 ኢሲያሲ ካሴቲዴ፡
 «ኡባፔ ዋልቃማ ጎዳይ ኑሲ
 ኣማሬዳ ዜሬላ ኣሽኔንቶ፡
 ኑኒ ሶዶማ ካታማዳኒኔ
 ጋሞራ ካታማዳን ሃኔዶሺን»

ያጊ ሃሳዬዳ።

30 ያቲና፡ ኑኒ ዋጋኔ? ዌሎቲላ ኮዪቤና ኣዪሁዳ ጊዴና ኣሳይ ኣማኑዋን ዌሌዳ፤ 31 ሺን ኢሰራዔሊያ ኣሳይ ባሬንታ ዌሊሲያ ሂጊያ ኮዬዳዋንቱ ሄ ሂጊያ ዴሚቤይኪኖ። 32-33 ኣዪሲ ዴሚቤይኪኖ? ኡንቱንቱ ኦሱዋናፔ ኣቲን፡ ኣማኑዋን ዌሎቲላ ኮዪቤና ዲራሳ። ኡንቱንቱ ያሳ ማፃፋይ፡
 «ኣኬኪቲ፤ ታኒ ዌዮኔን ኣሳ ቋቢያ ሹቻ፡
 ኡንቱንቱ ኦጊያን ዛላ ዋላና።
 ሺን ኣኒ ኣማኒያ ኦኒኔ ዬላቴና»

ያገዳ ፃፊቶቹን ጹቢያ ሹቻን ጹቤቴዲና።

10

ኢስራዔሊያ አሳይ ያሳ ኦጊያ ካሊቤና

1 ታናዳን አማኒያዎንቶ፣ ታኒ ኢስራዔሊያ አሳው ታ ኩሜንገላ ዎዛናፔ አሞቲያዌኔ ያሳ ዎሲያዌ ኡንቱንቱ አታናሳ፤ 2 አዩሲ ጎፔ፣ ኡንቱንቱ ያሳው ኦላናው ሎይሊ ኮዪያዎ ታኒ ማርካታይ፤ ሺን ኡንቱንቱ ያሳው ኦላናው ሎይሊ ኮዪያ ኮሻይ ቱሙ ኤራቴላፔ ጊዴና። 3 አዩሲ ጎፔ፣ ያሳይ አሳ ዲሊሲያ ኦጊያ ኡንቱንቱ ኤሪናን፣ ባሪንቱ ሁጼ ዲሎቴላ ኤሳናው ኮዬዲኖ፤ ቃሲ ባሪንቱ ሁጼው ያሳይ አሳ ዲሊሲያ ኦጊው ኤኖ ጊቤይኪኖ። 4 አዩሲ ጎፔ፣ አማኔዳ ኡባይ ዲላናዳን፣ ኪሪሰቶሲ ሂጊያ ቆፋ ፖሌዳ።

አቶቴላይ ኡባሳ

5 አሳይ ሂጊው አዛዜቲዴ ዲሊያባው ሙሴ፣ «ሂጊ አዛዚያዎ ኦሊያ ኦኒኔ ሄ ሂጊያን ፓፃ ዴባና» ያገ ፃፊዳ፤ 6 ሺን አማኑዎን ዲሊያባው ጌቴቴዳዌ ሃዎ፤ «ኔ ዎዛናን፣ <ኦኒ ሳሉዎ ፑዴ ባኔ?> ጎፓ። ሄዌ ኪሪሰቶሳ ዲጌ ዎላናሳ፤ 7 ዎይ «ዲጌ ሳባ ጋርሳ ዎዳናዊ ኦኔ?» ጎፓ። ሄዌ ኪሪሰቶሳ ሃይቁዎፔ ዴንላናሳ። 8 ሺን ኢ ጊያዎ ሃዎ፤ «ያሳ ቃላይ ኔ ማታና፤ ኔ ዶናኒኔ ኔ ዎዛናን ዴዔ» ጌቴቴዳ» ያጌ። ሄዌካ ኦኒ ሂንቱንቶ ኦዲያ አማኑዎ ቃላ።

9 ኔኒ፣ «ዩሱሲ ጎዳ» ጋዴ ኔ ዶናን ማርካቶፔ፣ ቃሲ ያሳይ ሃይቁዎፔ አ ዴንጼዳዎ ኔ ዎዛናን አማኖፔ፣ ኔኒ አታና። 10 አዩሲ ጎፔ፣ አሳይ ባሪ ዎዛናን አማኒዴ ዲሊ፤ ባሪ ዶናንካ ማርካቲዴ አቴ። 11 ያሳ ማፃፋይ፣ «ኦኒ አማኒያ ኦኒኔ ዩላቴና» ያጌ። 12 አዩሁዳ አሳኔ አዩሁዳ ጊዴና አሳ ጊዶን ዲማቴላይ ባዎ። ኢቲ ያሳይ ኡባ ጎዳ፤ ኢ ባሪና ያሲያ ኡባቶ ዳር ኬካ። 13 አዩሲ ጎፔ፣ ያሳ ማፃፋይ፣ «ጎዳ ሱንገላ ያሲያ ኦኒኔ አታና» ያጌ።

14 ያቲና፣ ኡንቱንቱ አ አማኒቤናዎንታ ጊዶፔ፣ ዎቲ አ ያሳናው ዳንዳዪኖ? ቃሲ ቃላ ሲሲቤናዎንቱ ዋኒ አማናናው ዳንዳዪኖ? ቃላ ኦዲያዌ ዳዮፔ፣ ኡንቱንቱ ዋኒ ሲሳናው ዳንዳዪኖ? 15 ቃሲ ቃላ ኦዲያዎንቱ ኪቴቴናን አሳፔ፣ ኦሱ ዎቲ ኦዴታናው ዳንዳዪኖ? አዩሲ ጎፔ፣ ያሳ ማፃፋይ፣ «ናሹቺያ ሚሺራቺዎ ኦዲያዎንቱ ዩሳይ ዎቲ ሎዒ!» ያጌ።

9:32-33 ኢሳ 28:16 10:5 ዎግ 18:5 10:6 ዛር 30:12-14 10:11 ኢሳ 28:16 10:13 ኢዩ 2:32 10:15 ኢሳ 52:7

16 ሺን ኡንቱንቱ ኡባይ ዎንጋላው ኣዘዘቲቤይኪና፤ ኣዪሲ ጎፔ ኢሲያሲ። «ታ ጎዳው፡ ኑኒ ማርካቲዳዎ ኦኒ ኣማኔዳ?» ያጌዳ።

17 ሲሚ ኣሳይ ቃላ ሲሲዳ ኣማኔ፤ ቃሲ ኢቲ ኡራይ ኪሪሰቶሳ ቃላ፡ ኦዲና ሲሲ።

18 ሺን ኡንቱንቱ ቃላ ሲሲቤናዎ ቱሜ ጋዴ ታኒ ኣቻይ። ቱማ ኡንቱንቱ ሲሲዲና፤ ያሳ ማፃፋይ፡

«ኡንቱንቱ ሃሳያ ኮሻይ

ሳዓ ኡባን ላሌቲዳ፤

ኡንቱንቱ ቃላይካ ሳዓ ጋፃ ጋኬዳ»

ያጌዳ። 19 ሺን ኢሰራዔሊያ ኣሳቱ ኤሪቤይኪኖዬ ጋዴ ታኒ ኣቻይ። ሙሴ ካሴ፡

«ታኒ ሂንቱንታ ኣሳ ጊዳና ኣሳቱዎን ሴሊሳና፤

ቃሲ ኤያ ኣሳቱዎን ታኒ ሂንቱንታ ሃንቱላሳና»

ያጌዳ። 20 ቃሲ ኢሲያሲ ዳር ፃሊዳ፡

«ታና ኮዪቤናዎንቶ ቤታዲ፤

ታና ኦቲቤናዎንቶካ ቆንጫዲ»

ያጌ። 21 ሺን ኢሰራዔላቱዋባ ኢ ሃሳዪዳ፡

«ጋላሳ ኡባ ኣዘዘቲናዎንቶኔ

ታዋ ኢዲያዎንቶ ታ ኩሺያ ሚጫዲ»

ያጌ።

11

ያሳይ ኢሰራዔሊያ ኣሳ ዉርሲ ኦሊቤና

1 ያቲና፡ ያሳይ ባሬ ኣሳ ኢፃዳ ጋዴ ኦቾ? ሄዎ ጊዳና፤ ኣዪሲ ጎፔ፡ ታኒ ታ ሁጴው ኢሰራዔሊያ ኣሳ፤ ኣብራሃሚ ዛሬ፤ ቢኒያማ ያራ።

2 ያሳይ ኮይር ዶሬዳ ባሬ ኣሳቱዎ ኢፃና፤ ያሳ ማፃፋይ፡ ኤላሳ ታሪኪያ ጊዳን፡ ኤላሲ ኢሰራዔላቱዎ ያሳ ሲንፋን ዎቲ ዎቲንቶ፡ ሂንቱ ኤሪታ።

3 «ጎዳው፡ ኡንቱንቱ ሄ ሱንፋን ናባቱዎ ዎጴዲና፤ ኔ ያርሺያሳካ ኮሌዲና። ያቲና፡ ታኒ ታ ፃላላይ ኣታዲ።

ቃሲ ኡንቱንቱ ታናካ ዎጳናው ኮዪና» ያጌዳ።

4 ያሳይ ኣው ዋጊ ዛሬዳ? «ታኒ ኤቃ ባዓላው ጉልባቲቤና ላፑ ሻዓ ኣሳ ታው ኣሻዲ» ያጌዳ።

5 ሃዋዲንካ ቃሲ ሃ ዎዲያን፡ ያሳይ ባሬ ኣጶ ኬካቲፋን ዶሬዳ ኣማሬዳ ኣሳቱ ዳዒና።

6 ሺን ኢ ባሬ ኣጶ ኬካቲፋን ዶሬዳ፤

10:16 ኢሳ 53:1 10:18 ማዘ 19:4 10:19 ዛር 32:21 10:20 ኢሳ 65:1 10:21 ኢሳ 65:2 11:3 1ካት 19:10፣ 14 11:4 1ካት 19:18

አቲን፡፡ ኡንቱንቱ ኦሱዋን ኡንቱንታ ደሪቤና፤ ሄዌ ዳዮፕ፡ አ አጾ ኬካቴላይ ቱሙ አጾ ኬካቴላ ጊዳና።

7 ያቲና፡ አይ? ኢሰራዔሊያ አሳቱ ባሬንቱ ኮዪያዎ ዳሚቤይኪና፤ ሺን ያሳይ ደራዳ አማራዳዋንቱ ዳሚዲና። ዮኮንቱ ዋዛናይ ሚኔዳ። 8 ሃዋዳንካ፡ ያሳ ማፃፋይ፡

«ያሳይ ኡንቱንቱ ባሬንቱ አይፊያን ቤዔናዲኔ
ባሬንቱ ሃይላን ሲሴናዳን፡
ሃዋ ጋካናው ኡንቱንቶ
አዛላ አያና ኢሜዳ»

ያጌዳ። 9 ቃሲ ዳዊቱ ያጌዳ፤

«ኡንቱንቱ ሚያ ጋይታይ ኡንቱንታ ጳሪያዳን አይቆ፤
ኡንቱንታ ጉፋንሶ፤ ኡንቱንቶ ኩሺያ ሺሪ ጨጎ።

10 ኡንቱንቱ ያለናዳን፡ ኡንቱንቱ አይፊ ጎዜቶ፤

ኡባ ዋዳ ባሬንቱ ሜቱዋን ቁኒዳ ዳዲኖ»

ያጌዳ።

11 ያቲና፡ አዪሁዳቱ ቆቤቱዳ ዋዳ፡ ዳንዳናዳን ኩንዳዲኖ? ሄዋ ጊዳና፤ ኡንቱንቱ ናጋራ ኦሌዳ ዲራው፡ አቶቱላይ ኡንቱንቱ አዪሁዳ ጊዳና አሳቱዋ ቃናታናዳን፡ አዪሁዳ ጊዳና አሳው ዬዳ።

12 ሺን አዪሁዳቱ ናጋራ ኦሌዳ ዲራው፡ አላሚው ዳር አንጁ ዬዳ፤ ቃሲ ኡንቱንቱ ኩንዳላይካ አዪሁዳ ጊዳና አሳው ዳር አንጁዋ አሄዳ። ያቲና፡ አዪሁዳቱ ኡባይ ጉጃቲያ ዋዳ፡ አንጁ ዋይሳ ኬና ዳራንዳሻ!

አዪሁዳ ጊዳና አሳይ አታና አቶቱላ

13 ሺን ታኒ ሃዒ ሂንቱንቶ፡ አዪሁዳ ጊዳና አሳው ሃሳያይ፤ ታኒ አዪሁዳ ጊዳና አሳው ዬሱሲ ኪቱዳዋ ጊዲያ ዲራው፡ ታ ኦሱዋ ቦንቻና። 14 ታኒ ታ ዛሬ ጊዲያ አሳቱዋ ቃናታንቻቱዋ ኡዶፕ፡

ኦኒ ኡሪ ኡንቱንቱ አማራዳዋንታ አሺናን አገኪ። 15 አዪሲ ጎፕ፡ ያሳይ ኡንቱንታ ኢዳዳ ዋዳ፡ ሃ አላሚ ያሳና ሲጌቱዳ። ያቲና ያሳይ ኡንቱንታ ሺሺ አኪያ ዋዳ፡ ሃይቄዳዌ ዳዑዋ ዳማናፕ አቲን፡ አይ ሃናኔ?

16 ኮይሮ አይፌ ባጋ ሙናቃይ አንጃቱዳዋ ጊዶፕ፡ ሙሜ ሙናቃይካ ቃሲ አንጃቱዳዋ ጊዳና፤ ኢቲ ሚላ ፃጵ አንጃቱዳዋ ጊዶፕ፡ ሃይላይ ኡባይካ ቃሲ አንጃቱዳዋ ጊዳና። 17 ሺን ዋራን ደሌዳ ዋጋራ ሚላ ቃንካፕ ኢቱዋ ኢቱዋ ካሬዳሳን፡ ኔና ዋራን ደሌዳ ዋጋራ ሚላ ማላ ሄ ዋጋራና ጋሊ ቃቸዶ፤ ኔኒ ቃሲ ዛይቲ

11:8 ዛር 29:4፤ ኢሳ 29:10 11:9 ማዝ 69:22-23

ከሲያ ዋጋራ ሚላ ፃጵዋና ኢቲፔ ዳዓ። 18 ሲሚ ኔኒ ሄ ካሬቲ ዋጵዳ ቃንካቱዋ ቦላን ኦቶሬታናው ቤሴና፤ ሺን ኔኒ ኦቶሬቲያዋ ጊደፔካ። ፃጵ ኔና ቶኬፔ ኦቲን፣ ኔኒ ፃጵዋ ቶኬናዋ ኦኬካ።

19 ሄዋ ዲራው ኔኒ፣ «ኤ፤ ሺን ቃንካቱ ታኒ ኡንቱንቱ ሳዓን ጌላናዳን ካሬቲዲኖ» ያጋና። 20 ሄዋ ቱማ፤ ኡንቱንቱ ኦማኒቤና ዲራው፣ ካሬቲዲኖ፤ ኔኒ ኦማኔዳ ዲራው፣ ሄ ሳዓን ኤቃዳ። ሺን ያያፔ ኦቲን፣ ኦቶሮ ቆፋ ቆፖፓ። 21 ኦዲሲ ጎፔ፣ ያሳይ ሜጴታ ቃንካ ማላቲያዋንቶ፣ ኦዲሁዳቶ ቃሬቲቤናዋ ጊደፔ፣ ኔው ቃሬቲያዋ ማላቲ።

22 ሲሚ ያሳ ከካቱላኔ ፃላቲላ ቤዓ። ኩንዳዳዋንቶ ኢ ፃላ፤ ሺን ኔኒ ኦ ከካቱላኒ ሚናዳ ዳዎፔ፣ ኢ ኔው ከካ፤ ሄዋ ጳዮፔ፣ ኔኒካ ቃሲ ካሬታና። 23 ኦዲሁዳቱካ ቃሲ ኦማኔናን ኢዲያዋ ኦጎፔ፣ ያሳይ ካሴ ኡንቱንቱ ዳዒያሳን ዛሬዳ ዋላና፤ ኦዲሲ ጎፔ፣ ኢ ኡንቱንታ ዛሬዳ ዋላናው ዳንዳዬ። 24 ኦዲሲ ጎፔ፣ ያሳይ ሂንቱንታ ዋራን ዳዒያ ኮይሮ ሜጴታ ዋጋራ ሚላፔ ቃንዲዳ፣ ሂንቱንቱ ሜጴታን ዋራን ደሎዋንቱዳን ጊዳናን ጋዴን ቶኬዳ ዋጋራ ሚላና ጋሴ ኦይሴዳዋ ጊደፔ፣ ያቲና፣ ሄ ካሬቲ ዋጵዳ ኮይሮ ሜጴታ ቃንካቱዋ ዛሬሴዳ፣ ኡንቱንታ ኮይሮ ሜጴታን ደሌዳ ባሬንቱ ዋጋራ ሚላና ጋሴ ቃቻናው፣ ኦ ኦዬ ያናናዌ?

ያሳ ማርታይ ኡባሳ

25 ታናዳን ኦማኒያዋንቶ፣ ታኒ ሂንቱ ኤራናዳን ኮዲያ ቱሙ ፀራ ዬዉ ዳዔ፤ ሄዋ ሂንቱ ሂንቱንታ ሂንቱሬካ፣ ኦኒ ኦጴዳ ኤራንቻ ያጊዳ ቆፒያዋ ዲጌ፤ ኢሰራዔሊያ ኦሳፔ ባጋይ ሲሴናን ኢዲዳ፤ ሺን ሄ ሲሴናን ኢዲያዌ ኦዲሁዳ ጊዳና ኦሳ ኩሜንላ ፓይዱ ያሳኮ ጋካናሲ ጋማዓና። 26 ሃዋዳንካ፣ ኢሰራዔሊያ ኦሳይ ኡባይ ኦታና፤ ያሳ ማፃፋይ ሃዋዳን ያጌ፤

«ኦሺያዌ ዲዮኔ ጌቲቲያ ካታማፔ ዪዳ፣ ናጋራ ኦሱዋ ኡባ ያዪቆባ ዛሬያፔ ዲጋና።

27 ታኒ ኡንቱንቱ ናጋራ ኦቶ ያጊያ ዋዳ፣ ኡንቱንቱና ጌላና ቃላ ጫቁ ሃዋ»

ያጌ።

28 ኦዲሁዳ ጊዳና ኦሳቶ፣ ኦዲሁዳቱ ዋንጋላ ሚሺራቱዋ ባጋና ሂንቱ ዲራው፣ ያሳና ዋርኬ፤ ሺን ያሳ ደራዋ ባጋና ኦዋቱዋ ዲራው፣ ኡንቱንቱ ኢ ሲቂያዋንታ። 29 ኦዲሲ ጎፔ፣ ያሳይ ባሬ ኦማዳዋ ጉዬ ኦኬና፤ ቃሲ ባሬ ዪሴዳዋ ኢዳዲ ጌና። 30 ኦዲሁዳ ጊዳናዋንቶ፣ ያሳው ሂንቱ ካሴና ኦዛዜቲቤይኪታ፤ ሺን ኦዲሁዳቱ

አዛዜቴናን ኢጭዳ ዲራው። ያሳ ማርቴላ ሃሲ ሂንቴ አኩዲታ።
31 ሃዋዳን፣ ሂንቴ አኩዳ ማርቴላ ዲራው፣ አዪሁዳቱ ቃሲ ያሳ ማርቴላ ሃሲ አካናዳን፣ ያሳው አዛዜቴናን ኢጭዲሮ። 32 አዪሲ ጎፕ፣ ያሳይ አሳ ኡባ ማራና ማላ፣ አሳይ ኡባይ አው አዛዜቴናን ኢጭያ ሃኖታን ቃቼዳ።

33 ያሳ ዱሪቴላይ ዋይሳ ኩና ዳሬ? አ አቆ ኤራቴላይኔ አ ኤራቴላይ ዋይሳ ኩና ጨሜ? አ ፐርዳ ኦዳናዊ ኦኔ? ኢ ባሬ ኦሊያዋ አዪሲ ኦሊንቶ፣ ኦኔ አኬኪያዌ? 34 ሄዋ ያሳ ማፃፋይ፣ «ጎዳ ዋዛና ኤሪያዌ ኦኔ? አ ዘራናው ዳንዳዪያዌ ኦኔ? 35 ዋይ ባሬ ኩሺያ ዘራና ማላ፣ አው ኢቲባ ኢሜዳዌ ዳዒ?» ያጌ።

36 አዪሲ ጎፕ፣ ኡባባ ኢ ሜዴዳ፤ ቃሲ ኡባባይካ አ ማታኒኔ አዉኔ ዳዔ፤ ያሳው ሜዲናው ቦንቹ ገደ። አሜንዒ።

12

ያሳው አላናዳን ኮኒ ዋኒዳ ዳዒናው ቤሲ?

1 ስሚ ታናዳን አማኒያዋንቶ፣ ሂንቴ ሂንቴ ኦናቴላ ያሳ ናሽቼያ ዴዎኔ ጌሻ ያርሹዋ ኡዲዳ፣ ያሳው ሽሻናዳን፣ ታኒ ሂንቴንታ ያሳ ማርቴላን ዋሳይ፤ ያሳው ሂንቴ ጎዪናናው ቤሲያ ቱሙ አኒ ሄዋ።

2 ያሳይ ሂንቴ ቆፋ ኡባና ዲማዪዳ፣ ሂንቴንታ ላዋፕ ኦቲን፣ ሃ አላሚያ አሳ ማላቶፕቴ። ሄ ዋዳ ሂንቴ፣ ያሳ ሽኒ፣ ሎዎባይ፣ አ ናሽቼያባይኔ ቃሲ ፖሎ ገዴዳባይ አዬንቶ ኤራኒታ።

3 ያሳይ ታው ኢሜዳ አቆ ከካቴላን ታኒ ሂንቴንቶ ኦዳይ። ሂንቴንቴ ቆፓናው ቤሲያዋፕ አሊዳ፣ ኦቶሩዋን ቆፖፕቴ፤ ሄዋ አኒዳ፣ ዋዛናማ አሳዳን ቆፕቴ፤ ያሳይ ሂንቴንቶ ሁጲያን ሁጲያን ኢሜዳ አማኑዋ ኩናን ሂንቴ ቦላ ፐርዲቴ። 4 ኦ ኢቲ ቦላ ገደን፣ ጮራ ቦላ ቆዋቱ ዳዒና፤ ሄ ቆዋቱዋ ኡባዉካ ዲማ ዲማ ኦሱ ዳዔ። 5 ሃዋዳን፣ ኮኒ ጮራ አሳ ገደፕካ፣ ኪሪሰቶሳ ባጋና ኢቲ አሳ። ቃሲ ኮኒ ኢቲ አሳቴላ ቆዋቱዋዳን፣ ኢቲ ኢቲዋና ኦይቄቲ ኡቴዶ። 6 ያሳይ ኦሲ ኢሜዳ አቆ ከካቴላን ዲማ ዲማ ኢዋታይ ዳዔ። ኦ ኢዋታይ ናቤቴላ ገደፕ፣ ኦሲ ዳዒያ አማኑዋ ኩና ኦዳናው ቤሲ። 7 ሃራቱዋ ማዲሳ ገደፕ፣ ሄ ኦሱዋን ሚናናው ቤሲ፤ ታማሪሱሳ ገደፕ፣ ሄ ታማሪሱዋን ሚናናው ቤሲ። 8 ሃራ አሳቱዋ ሚኒሱሳ ገደፕ፣ ሄ ኦሱዋን ሚናናው ቤሲ። ባሬ ሁጲው ዳዒያባፕ ሃራቱዋሲ ኢሚያ ኮኒኔ ዋዛናፕ ኢዋ። ማታይ ዳዒያ

11:33 ኢሳ 55:8 11:34 ኢሳ 40:13 11:35 ዮብ 41:11 11:36 1ቆር 8:6

ኡራይ ሚኒሲ ኦላናው ቤሴ፤ ሃራቱዋሲ ከኪያ ኡራይ ናሼቻን ከካናው ቤሴ።

9 ሂንቴንቱ ሲቁ አሳ ቤሳናው ሲቁቲያዋ ጊዳናው ቤሴና። ኢታባ ኢዲቴ፤ ሎዖባ ሚኒሲዴ ኦይቂቴ። 10 ኢቱ ኢቱዋና ኢሻቱዋዳን ሲቁቲቴ፤ ኢቱ ኢቱዋ ቦንቺያዋን ናሼቲቴ። 11 ሚኒዴ ኦሊቴ፤ አዛሎፒቴ፤ ሂንቴ ኩሜንላ ዋዛና፤ ጎዳው ኦሊቴ። * 12 ያሳይ ሂንቴንቶ ኢማና ጌዳዋን ናሼቲቴ፤ ዋዪያን ጌንጨቴ። ኡባ ዋዴ ያሳ ዋሲቴ፤ 13 ያሳ አሳቱዋ ኮሺያባን ማዲቴ፤ ኢማላ ዋሲቴ።

14 ሂንቴንታ ዩዴርሲያዋንታ አንጂቴ፤ አንቴንታ አንጂቴ፤ አቲን፣ ሹቆፒቴ። 15 ናሼቲያዋንቱና ናሼቲቴ፤ ዩኪያዋንቱናካ ዩኪቴ። 16 አሳ ኡባው ኢቲ ማላ ቆፋ ቆፒቴ፤ ኦሊያባን ኡባን ሂንቴንታ ቶቺዴ ዴባቴ፤ ጠ አቲን፣ ኦቶሬቶፒቴ፤ ሂንቴንታ ሂንቴሬካ አጶ ኤራንቻ ጌዴ ቆፖፒቴ።

17 ኦኒኔ ሂንቴንቶ ኢታባ ኦላፒ፣ ሄ ኡራው ኢታባ ኦሊ ዛርፒቴ፤ አሳ ኡባው ሎዖባ ኦላናው ቆፒቴ። 18 አሳ ኡባና ሳርቴላን ዴባናው፣ ሂንቴ ባጋና፣ ሂንቴንቶ ዳንዳዬቴዳባ ኡባ ኦሊቴ። 19 ታናዳን አማኒያዋንቶ፣ ሂንቴ ሂንቴ ሁጹው አሳው ሃሉዋ ከሶፒቴ። ያሳይ ሃሉዋ ከሳናዳን፣ አ ቦላ ኦሊቴ። አዪሲ ጎፒ፣ ያሳ ማፃፋይ፣

«ጎዳይ፣ ሩኒ ሃሉዋ ከሳና፤ ታኒ ኮሺያ ጨጋና ጌ»

ያጌ።

20 ሺን ያሳ ማፃፋይ፣

«ኔ ሞርኪ ኮሻቶፒ፣ ሚዛ።

ሳሜቶፒ፣ ኡሻ።

አዪሲ ጎፒ፣ ኔኒ ሄዋ ኦሊያዋን

አ ዳሪሳ ዩሊያሳ»

ያጌ።

21 ኢታባ ሎዖባን ያናፒ አቲን፣ ኢታባይ ኔና ያናፖ።

13

ጋዲያ አዪሲያዋንቱሲ ኤኖ ጋናው ቤሴ

* 12:11 ኩሜንላ ዋዛና፤ ጎዳው ኦሊቴ፣ ጌሻ አያናኒ ካሌሴቲዴ ከቲቲያዋንታ ጊዲቴ። ጠ 12:16 ሂንቴንታ ቶቺዴ ዴባቴ፣ አሺኬ ጊዲቴ ጉሳ። 12:16 ለጭ 3:7 12:19 ዛር 32:35 12:20 ለጭ 25:21-22

1 አሳይ ኡባይ ጋዲያ አዩሲያዋንቱሲ ኤኖ ጋናው ቤሴ፤ አዩሲ ጎፔ፣ ያሳይ ጌናን ዳዒሺን፣ ጋዲያ አዩሲያዊ ዳዒናው ዳንዳዬና። ሃዒ ዳዒያ አዩሲያዋንቱካ ያሳይ ዋሌዳዋንታ። 2 ሃዋ ዲራው፣ ሃዒ ዳዒያ አዩሲያዋንታ ኢዲያ ኦኒኔ ያሳ አዛዙዋ ኢዳ፤ ባሬ ቦላ ፐርዳ አሃ። 3 አዩሲ ጎፔ፣ አዩሲያዋንቱ ኢታባ ኦሌያዋንታ ያሻናዋፔ አቲን፣ ሎዖባ ኦሌያዋንታ ያሸኪኖ። አዩሲያዋ ያዬናን አጋናው ኮያይ? ያቶፔ ሎዖባ ኦላ፤ ኢ ኔና ጋላታና። 4 አዩሲ ጎፔ፣ ኢ ኔው ሎዖባ ኦላናው፣ ያሳው ቆማ። ሸን ኔኒ ኢታባ አላፔ፣ ኢታባ ኦሌዳዋ ኢ ሴሪያ ዲራው፣ አው ያያ፤ ኢ ያሳ ቆማ። ቃሲ ኢታባ ኦሌያዋንቱ ቦላ ያሳ ሃንቁዋ ኢ አሃ። 5 ሃዋ ዲራው፣ ጋዲያ አዩሲያዋንቱሲ ኤኖ ጊያዌ ያሳ ሙራ ያላላሳ ጊዳናን፣ ሂንቴንቱ ዋዛና ቆፋ ዲራውካ ኤኖ ጋናው ቤሴ።

6 አዩሲ ጎፔ፣ ጋዲያ አዩሲያዋንቱ ባሬንቱ ኦሱዋ ኦሌያ ዋዴ፣ ያሳው ኦሌያ ዲራው፣ ሂንቴ ቃራዳ ቃንዲያዌ ሃዋሳ። 7 ኡባ አሳውካ ቤሲያዋ ኢሚቴ። ጌራ ጌራናው ቤሲያዋ ጌሪቴ፤ ቃራዳ ቃንፃናው ቤሲያዋ ቃንፃቴ፤ ያያናው ቤሲያዋ ያዩቴ፤ ቦንቹ ቤሲያዋ ቦንቹቴ።

ኢቱ ኢቱዋና ሲቁቲቲ

8 ሂንቴንቱ ኢቱ ኢቱዋና ሲቁታናፔ አቲን፣ ሃራ አጩ ኦ ቦላኒኔ ዳዖፖ። አዩሲ ጎፔ፣ ሃራ ሲቁያ ኦኒኔ ሂጊ ጊያዋ ፖሌዳ። 9 «ዋሹዋፓ፤ ዋዶፓ፤ ዉዖፓ፤ አሳባ አሞቶፓ» ጊያ አዛዛቱኔ ሃራ አዛዛቱ ኡባቱ፣ «ኔ ሸሩዋ ኔ ሁጲያዳን ሲቃ» ጊያ አዛዙዋን ኩሚና። 10 ባሬ ሸሩዋ ሲቁያ ኦኒኔ አው ኢታባ ኦሌና፤ ሃዋ ዲራው፣ ሸሩዋ ሲቁያዌ ሂጊያ ኡባው ኤኖ ጊያዋ።

11 ጌሚቡሹዋፔ ሂንቴ ቤሳቲያ ሳቲ ሃዒ ጋኬዳ ዲራው፣ ሃ ዋዲያ አከኪቴ። አዩሲ ጎፔ፣ ኦኒ ኮይሮ አማኔዳ ዋዲያፔ፣ ኦኒ አቲያ ዋዲ ሃዒ ኦኮ ማታቴዳ። 12 ቃማይ አዳናው ሃኔ፤ ጋላሳይ ማታቴዳ። ሲሚ ኦኒ ዱማ ኦሱዋ አጊዴ፣ ፖቡዋን ኦሌታናው፣ ኦላ ሚሻ ማዮይቴ፤ 13 ጋላሲ ፖቡዋን ዳዒያ አሳዳን፣ ኦኒ ማራ ዳዖይቴ። ዬላኒኔ ማሉዋን ጊደፖ፤ ዋሹሙሳኒኔ ዋሹማናው ካጄሉሳና ጊደፖ፤ ፓሉማኒኔ ቃናቲያን ጊደፖ። 14 ሸን ጎዳ ዬሱሲ ኪሪሰቶሳ፣ ኦላ ሚሻ ኦ ማዩቴ፤ ሂንቴ ናጋራንቻ አሳቴላይ ባሬ ዋዛና አሙዋ ፖላናዳን፣ አው ቆፖፒቴ።

13:9 ኬስ 20:13-15፣ 17፤ ዛር 5:17-19፣ 21፤ ዋግ 19:18

14

እሳ ቦላ ፐርዳናን አጉሳ

1 አማኑዋን አዛሊያ ኡራ ሺሺ አከቱ። ሺን ኢ ባሬ ሁጵው ቆፐያባን አናና ፓሉሜቶፐቲ። 2 ኢቲ ኡራ አማኑ ኢ አያ ሚናኔ ዲጌና። ሺን አማኑዋን አዛሊያ ኡራይ ጋዴን ሞኬዳባ ፃላላ ሜ። 3 ኡባባ ሚያ ኡራይ ኡባባ ሜና ኡራ ካጵፖ፤ ኡባባ ሜና ኡራይካ ኡባባ ሚያ ኡራ ቦላ ፐርዳፖ። አዪሲ ጎፔ፣ ያሳይ አ ሺሺ አከዳ። 4 ሃራ እሳ ቆማ ቦላ ፐርዲያዌ ኔኒ ኦኔ? ኢ ኩንዲና ዋይ ዴንዲና ባሬ ጎዳሳ፤ ሺን ጎዳይ አ ዴንፋናው ዳንዳዪያ ዲራው፣ ኢ ኤቃና።

5 ኢቲ ኡራይ፣ «ሂቃ ጋላሳይ ሃራ ጋላሳቱዋፔ አጼ» ያጌዴ ቆፐያ ዋዴ፣ ሃራይ፣ «ኡባ ጋላሳቱካ ኢቲ ማላ» ጌዴ ቆፔ። አሳይ ኡባይ ሁጲያን ሁጲያን ሄዋዳን አዪሲ ቆፐንቶ አከኮ። 6 ኢቲ ጋላሳ ሃራ ጋላሳቱዋፔ አሊዴ ቦንቺያ ኡራይ ጎዳ ቦንቺ ቦንቺ፤ ቁማ ሚያ ኡራይካ ጎዳ ቦንቺ ሜ። አዪሲ ጎፔ፣ ኢ ሄ ቁማ ዲራው፣ ያሳ ጋላቲ። ቁማ ሚናዌካ ጎዳ ቦንቺ ሜናን አጌዳ፤ ቃሲ ያሳ ጋላቲ። 7 አዪሲ ጎፔ፣ ኑፔ ኦኒኔ ባሬ ሁጵ ፃላላው ዴዴና፤ ቃሲ ኦኒኔ ባሬ ሁጵ ፃላላው ሃይቁና። 8 ኑኒ ፓፃ ዴፖፔ፣ ጎዳው ዴዴቶ፤ ቃሲ ሃይቆፔካ፣ ጎዳው ሃይቁቶ። ሲሚ ኑኒ ፓፃ ዴፖፔ ዋይ ሃይቆፔካ ጎዳሳ።

9 ሄዋ ዲራው፣ ከሪሰቶሲ ፓፃ ዴዲያዋንቶኔ ሃይቁዳዋንቶ ጎዳ ጌዳናው ሃይቁዳ፣ ሃይቁዋፔ ዴንዴዳ። 10 ያቲና፣ ኔኒ ኔ አሻ ቦላ አዪሲ ፐርዳይ? ዋይ ኔኒ ኔ አሻ አዪሲ ካጵይ? ኑኒ ኡባይካ ያሳ ፐርዳ ኦይዲያ ሲንፋን ኤቃና። 11 አዪሲ ጎፔ፣ ያሳ ማፃፋይ፣ « ታኒ ጎዳይ ታ ዴዑዋን ጫቃይ፤

አሳይ ኡባይ ታ ሲንፋን ጉልባታና።

ቃሲ ታኒ ያሳ ጌዲያዋ

አሳይ ኡባይ ማርካታና) ያጋይ»

ያጌ። 12 ሲሚ ኑኒ ሁጲያን ሁጲያን ኑባ ያሳው ኦዳና።

ናጋራ ኦሱዋሲ ጋሱዋ ጌደፓ

13 ሄዋ ዲራው፣ ኑኒ ኢቲ ኢቲዋ ቦላ ፐርዲያዋ ሃዋፔ ሲንፋው አኔ አጎይቲ። ሺን ኡባፔ አሊዴ፣ ሂንቲ አሻ ጱቢያባ ዋይ ናጋራን ኦሊያባ ኦፊዳን ቆፋ ቃቺቲ። 14 ታኒ ጎዳ ዩሱሲ ከሪሰቶሳና ዴዲያዋን፣ ባሬ ሁጵው ቱና ጌዲያባይ ባይናዋ ኤራይኔ አከካይ። ሺን ኢቲ ኡራይ ኢቲባ ቱና ጌዴ ቆፖፔ፣ ሄዌ እው ቱና ጌዴ። 15 ኔኒ ሚያባ ዲራው፣ ኔ አሻ ቆሆፔ፣ ሲሚ ኔኒ ሲቁዋን ዴዳካ።

14:11 እሳ 45:23

ኪሪስቶስ ኣ ዲራው ሃይቄዳ ኣሳ ኔ ሚያ ቁማን ባዩዘ፡፡
16 ሲሚ ኔኒ ሎዖባ ጊያዋ ኣሳይ ካቶ፡፡ 17 ኣዩሲ ጎፔ፡ ያሳ ካወቴሳይ ጌሻ ኣያናይ ኢሚያ ዒሎቴሳ፡ ሳርቴሳኔ ናሽቻ ጊዲያዋፔ ኣቲን፡ ሙሳኔ ኡሻ ጊዴና፡፡ 18 ኣዩሲ ጎፔ፡ ኪሪስቶሳው ሃዋዲን ኦሲያ ኡራይ ኦኒኔ ያሳ ናሽቹ፤ ኣሳይካ ኣ ጋላቴ፡፡

19 ያቶፔ፡ ኣኔ ኩኒ ሳርቴሳ ኣሂያባኔ ኩና ኢቱዋ ኢቱዋና ሚኒሲያባ ኡባ ኮዬቶ፡፡ 20 ያሳ ኦሱዋ ቁማ ዲራው ባዩዘ፡፡ ቁማይ ኡባይ ጌሻ፤ ሺን ሃራ ኡራ ናጋራን ዩጊያዋ ሙሳይ ኢታ፡፡ 21 ሄዋሲ ኣሽዋ ማናን ዋይ ኡሻ ኡሼናን ኣጊያዌ ዋይ ኔ ኢሻ ቆሲያባ ኣያኔ ኦሴናን ኣጊያዌ ሎዓ፡፡

22 ሃ ዩወዋን ኔ ኣማኑዋ ኔፔኔ ያሳፔ ጊዲያን ናጋ፡፡ ኢቲ ኡራይ ሎዓ ጊዴ ኢ ኣማኔቴዳዋ ኦሲያ ዎዴ፡ «ታኒ ሎዑዋ ኦሳዲ» ጊዴ ባሬ ዋዛናኒ ኣማኔቶፔ፡ ሄ ኡራይ ቱሙ ኣንጃቴዳዋ፡፡ 23 ሺን ኢ ሄ ሚያባን ሲቶፔ፡ ኣ ሙሳይ ኣማኑዋና ጊዴና ዲራው፡ ያሳይ ኣ ቦላ ፒርዴ፤ ቃሲ ኣማኑ ባይናን ኦሴዳዌ ኣያዩኔካ ናጋራ፡፡

15

ኣሳ ናሽቻናው ቤሲያ ኦጊያ

1 ኩኒ ኣማኑዋን ሚኔዳዋንቱ ዳቡራንቻቱዋ ቶኩዋ ቶካናው ቤሴ፤ ኩኒ ኑ ያላላ ናሽቻናው ቤሴና፡፡ 2 ኩኒ ሁጲያን ሁጲያን ኑ ኢሻ ማዳናው፡ ኣማኑዋን ኣ ሚኒሳናዉኔ ናሽቻናው ቤሴ፡፡ 3 ኣዩሲ ጎፔ፡ ሃራይ ኣቶ ኪሪስቶሲካ ባሬና ናሽቹቤና፡፡ ሺን ያሳ ማፃፋይ፡ «ኔና ቦሬዳዋንቱ ቦሬዳ ቦሬ ታ ቦላ ዎዴዳ» ጌዳዋዳን ሃኔዳ፡፡

4 ያሳ ማፃፋይ ኩሲ ኢሚያ ጌንጫኒኔ ሚናታን ኩኒ ዳማና ጊዴ ናሽቻን ናጊ ኡቴዳዌ ዳዓና ማላ፡ ያሳ ማፃፋን ፃፊቴዳ ኡባባይ ኩና ታማርሳናው ፃፊቴዳ፡፡

5-6 ሂንቴንቱ ኡባይ ኢቲ ዋዛና ጊዲዴ፡ ኢቲ ቃላን ያሳ፡ ኑ ጎዳ ዩሱሲ ኪሪስቶሳ ኣወዋ፡ ቦንቻና ማላ፡ ጌንጩዋኔ ሚናቴሳ ኢሚያ ያሳይ፡ ሂንቴንቶ ኪሪስቶሲ ዩሱሲ ኦሴዳዋዳን፡ ኢቱ ኢቱዋና ኢቲፔ ዳዒያ ኢቲ ቆፋ ኢዎ፡፡

ጳውሎሳ ኦሱዋኔ ኣማኔና ኣሳው ጋኬዳ ሚሺራቹዋ ቃላ

7 ሄዋ ዲራው፡ ኪሪስቶሲ ሂንቴንታ ሞኬዳዋዳን፡ ያሳ ቦንቻ ኢቱ ኢቱዋ ሞኪቱ፡፡ 8-9 ኣዩሲ ጎፔ፡ ያሳይ ኣማኔቴዳዋ ጊዲያዋ ኤሪሳናው፡ ያሳይ ኣዎቶ ኢማና ጌዳዋ ቱማናናዉኔ ኣዩሁዳ ጊዴና

አሳይ ያሳ አ ማሮቴላ ዲራው ሰንቻናው ኪሪሰቶሲ አዪሁዳቶ ቆማ ጊዳዳዋ ሂንቴንቶ ኑዳይ። ሄዋ ያሳ ማፃፋይ።

«ሄዋ ዲራው፣ ታኒ ኔና አዪሁዳ ጊዳና አሳ ጊዳን ጋላታና፤ ኔ ሱንላካ ሳባና»

ያጌ።

10 ቃሲካ።

«አዪሁዳ ጊዳና አሳቶ፣ ያሳ አሳቱዋና ናሼቲቴ»

ያጌ።

11 ቃሲካ ጉጂዳ።

«ሂንቴንቶ፣ አዪሁዳ ጊዳና አሳቶ ኡባቶ፣ ጎዳ ጋላቲቴ፤ አሳው ኡባው፣ አ ጋላቲቴ»

ያጌ።

12 ቃሲካ ኢሲያሲ።

«ኢሴይ ዜሪላይ ዪዳ አዪሁዳ ጊዳና አሳ ሞዳናው ዳንዳና።

ቃሲ ኡንቴንቲ አ ባጋና ዳማና ጊዳ ናሼቻን ናጋና»

ያጌ።

13 ሂንቴንቲ አካና ጊዳ ናሼቻን ናጊያዌ ጌሻ አያና ዎልቃን ዲጫናዳን፣ ሂንቴንቶ ኢማና ጌዳ ያሳይ፣ ሂንቴ አ አማኒያ ዲራው፣ ሂንቴንቶ ናሼቻኔ ሳሮቴላ ኩንሊዳ ኢሞ።

ጳውሎሲ ፃሊዳ ፃፊዳ ጋሱዋ

14 ታናዳን አማኒያዋንቶ፣ ሂንቴንቲን ሎዎቴላይኔ ኤራቴላይ ኡባይ ኩሜዳዋኔ ቃሲ ኢቱ ኢቱዋ ዞራናው ዳንዳዪያዋ ታኒ ታ ሁጳው ኤራዲ። 15-16 ሺን ታኒ ሂንቴንታ ኢቲባ ኢቲባ ጉጂ ቆፊሳናው፣ ሃ ዳቢዳቢያ ጊዳን አይኔ ያዬናን ሂንቴንቶ ፃፋዲ። ታኒ ኪሪሰቶሳ ዬሱሳ ቆማ ጊዳዳ፣ አዪሁዳ ጊዳና አሳው ኦላናዳን፣ ያሳይ ታው አጵ ኬካቴላ ኢሜዳ ዲራው፣ ታኒ አይኔ ያያቤይኬ፤ አዪሁዳ ጊዳና አሳይ ጌሻ አያና ባጋና ያሳው ጌሻ ጊዳዳ፣ አ ናሼቻያ ያርሹዋ ጊዳናዳን፣ ያሳ ዎንጋላ ሚሺራቹዋ ኦዲያዋን ጌሻቴላን ኦላይ።

17 ሄዋ ዲራው፣ ታኒ ኪሪሰቶሳ ዬሱሳን ጊዳዳ ያሳው ኦሊያባን ጩቄታናው ዳንዳያይ። 18-19 አዪሁዳ ጊዳና አሳይ

15:8-9 2ሳሞ 22:50፤ ማዝ 18:49 15:10 ዛር 32:43 15:11 ማዝ 117:1 15:12 ኢሳ 11:10

ያሳው አዛዘታናዳን፤ ኪሪስቶስ ታ ባጋና ቃላን፤ አሱዋን፤
 ማላን፤ ማላታ ዋልቃኒኔ ገሻ አያና ዋልቃን ኦሌዳዋ ዓላላ ታኒ
 ኦዳና፤ ኦላቲን፤ ሃራባ ኦዳናው ዓሊኬ። ሄዋ ዲራው፤ ዩሩሳሌሜ፤
 ደማዴ፤ ኢሊዋሪቆና ጌቲቲያ ጋዲያ ጋካናው ዩያዴ፤ ኪሪስቶሳ
 ዋንጋላ ሚሺራቹዋ ዉርሳ ኦዳዲ። 20 ሃዋዳንካ፤ ታኒ ሃራ
 አሳይ ደሜዳዋ ቦላን ደሜናዳን፤ ኪሪስቶሳ ሱንሳይ ያሴቲቤናሳን
 ዋንጋላ ሚሺራቹዋ ኦዳናው አዋታዲ። 21 ሺን ያሳ ማፃፋይ፤
 «አባይ ሃዋ ጋካናው ኦዴቲቤናዋንቱ አ ቤዓናዋንታ፤
 ቃሲ አባ ሲሲቤናዋንቱ አከካናዋንታ»
 ያጌ።

ጳውሎስ ሮሜ ባናው ቆፕዳ

22 ሄዋ ዲራው፤ ታኒ ጮራ ዋዴ ሂንቴንቱኮ ያናው ኮያይ፤
 ሺን ያናው ዳንዳያቤይኬ። 23 ሺን ታኒ ሃዲ ሃ ሄራን ታ አሱዋ
 ዉርሴዳ ዲራውኔ ጮራ ላይላ፤ ደማዴ ሂንቴንታ ባዴ ቤዓናው
 ላዋቲዳ ዲራው 24 ሃዲካ ሂንቴንቱኮ ባና ጋዴ ቆፓይ፤ ታኒ
 ኢሲፔኔ ጌቲቲያ ጋዲያ ባዴ ሂንቴንታ ቤዓናው ኮያይ፤ ቃሲ
 አማራዳ ዋዲያ ሂንቴንታ ቤዓዴ ናሼቶዋ፤ ጉዬያን፤ ኢሲፔኔ
 ቢሺን፤ ሂንቴ ታና ማዳና ማላ ኮያይ።

25 ሺን ሃዲ ታኒ ያሳ አሳቱዋ ማዳናው፤ ዩሩሳሌሜ ባይ።
 26 አዪሲ ሳፔ፤ ማቁዳኒያኔ አካዪያ ጌቲቲያ ጋዲያን ዴዒያ
 ዋሳ ጎሌ አሳቱ ዩሩሳሌሜን ዴዒያ ሂዬሳቱዋሲ ሚሻ ኢማናው
 ኮዬዲኖ። 27 ኡንቴንቱ ባሬንቱ ሁጰው ሃዋ ኦሳናው ቆፋ ቃቹዲኖ።
 ኡንቴንቱ ሄ ሂዬሳቱዋ ማዳናዋ ኡንቴንቶ አጩ ዴዒ፤ አዪሲ
 ሳፔ፤ አዪሁዳቱ ባሬንቱ አያና አንጂዋ አዪሁዳ ጊዴና አሳቱዋና
 ሻኬዳዋ ጊደፔ፤ አዪሁዳ ጊዴና አሳቱካ ቃሲ ባሬንቶ ዴዒዳባን
 አዪሁዳቱዋ ማዳናው ቤሴ። 28 ሄዋ ዲራው፤ ታኒ ሃ አሱዋ
 ዉርሴዳዋ፤ ጉዬያንኔ ኡንቴንቶ ሸቄዳ ሚሻ ኡባ ኢሜዳዋ፤
 ጉዬያን፤ ኢሲፔኔ ባዴ ሂንቴ ማታና አጳና። 29 ታኒ ሂንቴንቱኮ
 ቢያ ዋዴ፤ ኪሪስቶሳ አንጂ ታናን ኩሚና ባናዋ ኤራይ።

30 ታናዳን አማኒያዋንቶ፤ ታው ያሳ ሂንቴ ዋሲዴ፤ ዋሳን
 ሂንቴ ታናና ሚናናዳን፤ ጎዳ ዩሱሲ ኪሪስቶሳ ባጋናኔ ገሻ አያናይ
 ኢሚያ ሲቆቴላን ታኒ ሂንቴንታ ዋሳይ። 31 ታኒ ዩሁዳን ዴዒያ
 አማኔናዋንቱ ኦታናዳኒኔ ቃሲ ታኒ ዩሩሳሌሜን ኦሊያ አሱ ያኒ
 ዴዒያ ያሳ አሳቱዋ ናሼቹያዋ ጊዳናዳን፤ ያሳ ዋሲቱ። 32 ቃሲ
 ያሳይ ሳፔ፤ ታኒ ሂንቴንቱኮ ናሼቻን ባዴ፤ ሂንቴ ማታን ሸዎፓና።
 33 ሳሮቴላ ያሳይ ሂንቴንቱና ኡባና ጊደ። አሜንዒ።

16

ሳርታ

1 ኪንኪሪያ ጌቲቲያ ካታማን ዳዒያ አማኒያ አሳና ኦሊያ ኑ ሚቻታ ፔባ ሎዖ ማጫ አሳ ጊዲያዎ ታኒ ሂንቲንታ ኤሪሳይ።

2 ሂንቲንቲ ኢዞ ጌሻቱ ጎዳ ሱንፋን ሞኪያዎዳን ሞኪቲ፤ ቃሲ ኢዞ ሂንቲንቲ፤ ኮዪያዌ አያ ጊዶፔካ፤ ኢዞ ማዲቲ፤ አዪሲ ጎፔ፤ ኢዞ ባሬ ሁጹው ጮራ አሳ ማዳው፤ ቃሲ ታና ታ ሁጹወካ ዳሪሳ ማዳው።

3 ኪሪሰቶሳ ዩሱሳ ኦሱዋ ታናና ኢቲፔ ኦሊያ ጲሪሰቁሊሲኔ ኢዚ አሲና አቁላሲ ታ ሳርቶዎ ኦዲቲ። 4 ኡንቲንቲ ታ ሸምፑዎ ዲራው፤ ባሬንቲ ሸምፑዎ አሏ ኢሜዲና። ኡንቲንታ ታ ፃላላ ጊዳናን፤ አዪሁዳ ጊዳና አሳ አማኒያ አሳይ ኡባይካ ጋላቲ። 5 ቃሲ ኡንቲንቲ ጎሊያ አማኒያ አሳይ ሸቁያሳ ኡዲዴ ጋኬቲያ አሳ ኡባ ሳር ጊቲ። ኢሲያ ጋዲያን ኪሪሰቶሳ ኮይሮ አማኔዳ ታ ሲቁያ ኤፓኔቶሳው፤ ታ ሳርቶዎ ኦዲቲ። 6 ሂንቲንቶ ሎይላ ዳቡሬዳ ማይራዎ ሳርቲቲ። 7 ታናና ቃሽ ጎሌን ዳዔዳ ታ ዳቦ ጊዳዳ አዪሁዳቲዎ፤ አንዲርኒቆሳኔ ዩኒያሳ ሳርቲቲ። ዩሱሲ ኪቲዳዎንቲ ጊዶን ኡንቲንቲ ሎይላ ኤሬቲዳዎንታ። ቃሲ ኡንቲንቲ ኪሪሰቶሳ ታፔ ካሲና አማኔዲና።

8 ጎዳና ኢቲፔቲላን ዳዒያ ታ ሲቆ ሳጊያ አምፕሊያቶሳው ታ ሳርቶዎ ኦዲቲ። 9 ኪሪሰቶሳ ኦሱዋ ኑናና ኢቲፔ ኦሊያ ኡርባናሳኔ ታኒ ሲቁያ ኢሰፃኩሳ ሳርቲቲ። 10 ኪሪሰቶሳና ኢ ዳዒያዌ ኤሬቲና ፓጪያ ፆኔዳ አጸሊሳው ታ ሳርቶዎ ኦዲቲ፤ አሪሰፖቢሎሳ ሶይ አሳወካ ታ ሳርቶዎ ኦዲቲ። 11 ታ ዳቦ ጊዳዳ አዪሁዳዊያ ሄርዲዮናኔ ኪሪሰቶሳ አማኒያ ናርሲሴሳ ሶይ አሳ ሳርቲቲ።

12 ጎዳ ኦሱዋን ዳቡሪያ ቲሩፋይናኔ ቲሩፎሶ ጌቲቲያ ማጫዎንታ ሳርቲቲ፤ ቃሲ ጎዳው ዳሮ ዳቡራዴ ኦሊያ ሲቁያ ፔርሲሶ ሳርቲቲ። 13 ጎዳ ኦሱዋን ሎይላ ኤሬቲዳ ሩፎሳዬወኔ ታና ባሬ ናዒዳን ማዴዳ ኦ ዳዪው ታ ሳርቶዎ ኦዲቲ። 14 ታ ሳርቶዎ አሲንኪራቶሳው፤ ፕሌጎናው፤ ሄርሜሳው፤ ፓቲሮባሳወኔ ኡንቲንቲና ዳዒያ አማኒያ ኢሻቲዎ ኡባው ኦዲቲ። 15 ፕሌጎና፤ ዩሎ፤ ኔሪያ፤ አ ሚቻቶ፤ ኦሎምፖሳኔ ኡንቲንቲና ዳዒያ ያሳ አሳቲዎ ኡባ ሳርቲቲ።

16 ጌሻ አሳው ቤሲያ ዩሬታ ዩሬቲዴ፤ ኢቲ ኢቲዎ ሳርቲቲ፤ ኪሪሰቶሳን አማኒያዎንቲ ኡባቲ ሂንቲንታ ሳር ያፕዲና።

ወርሴላ ዞሪያ

17 ታናዳን አማኒያዎንቶ፡ አሳ ጊደን ሻኮቴላ ሜዲያዎንታ፡ አሳ አማኖ ዲቦ ጊዲያዎንታኔ ሂንቴ ታማሪዳ ቲሚርቲያና ጋኬቴናዎ ታማሪሲያዎንታ ኣኬካናዳን፡ ታኒ ሂንቴንታ ዎሳይ። ኡንቴንቴኮ ሺቆፒቴ። 18 ኣዩሲ ጎፔ፡ ሄዎ ማላባ ኣሊያዎንቱ ባሬንቴ ኡሉዋሲ ኣሊኖፔ ኣቲን፡ ኑ ጎዳ ዩሱሲ ኪሪሰቶሳው ኣሊኪኖ፤ ባሬንቴ ላቢያ ሃሳያኒኔ ቁዲያን ኢታባ ቆፔና አሳ ዎዛና ባሌሊኖ። 19 ዎንጋላው ሂንቴ ኣዛዜቴዳዎ አሳይ ኡባይ ሲሴዳ። ሄዎ ዲራው፡ ታኒ ሂንቴባን ናሼታይ፤ ሺን ሎዎቴላው ሂንቴ ኣዲዳ ኤራንቻ ጊዳናዳኒኔ ቃሲ ኢታባው ኣሺኬ ጊዳናዳን ኮያይ። 20 ሳርቴላ ያሳይ ሴዓና ሂንቴ ጌዲያፔ ጋርሳና ሃኬና ማታ ዎዴ ጋጫና።

ኑ ጎዳ ዩሱሲ ኪሪሰቶሳ አዶ ኬካቴላይ ሂንቴንቴና ጊደ።

21 ታናና ኣሊያ ዲዎቶሴ ሂንቴንታ ሳር ያጌ፤ ቃሲ ሃዎዳንካ፡ ታ ዳባቱ ሉቂዮሲ፡ ያሶኒኔ ሶሲዳዊርሲ ሂንቴንታ ሳር ያጊና።

22 ታኒ፡ ፃርዲዮሲ፡ ሃ ዳቢዳቢያ ፃፊዳዌ፡ ሂንቴንቶ ጎዳ ሱንላን ሳርታ ኪታይ።

23 አማኒያ አሳይ ኡባይ ኣ ሶዪን ሸቁያ ታ ሲራ ጋዮሲ ሂንቴንታ ሳር ያጌ፤ ካታማ ሚሻ ኦይቁያ ኤራሰዎሲኔ ኑ ኢሻይ ቁዋርዎሲ ሂንቴንታ ሳር ያጊና። 24 ኑ ጎዳ ዩሱሲ ኪሪሰቶሳ አዶ ኬካቴላይ ሂንቴንቴና ኡባና ጊደ። አሜንዒ።

25 ኑኒ ያሳ ጋላቴቶ። ታኒ ዎንጋላ ባጋና ዩሱሲ ኪሪሰቶሳባ ኦዴዳዎዳኒኔ ዳር ዎዲያፔ ጌሚዴ፡ ሃዒ ቆንጩዳ ቲማቴላዳን፡ ሂንቴ አማኑዎን ሂንቴንታ ያሳይ ሚኒሳናው ዳንዳዬ። 26 ሺን ሃዒ ናባቱ ፃፊዳዎ ባጋና ቲማቴላይ ቆንጩያን ኤሬታናዳን ኦሌዳ፤ ቃሲ አሳ ኡባይ ያሳ አማኒዴ ኣዛዜታናዳን፡ ሜዲና ያሳ ኣዛዙዎን፡ ሃ ኣላሚያን ዴዒያ አሳ ዜሬላ ኡባው ቆንጩዳ።

27 ኣዴዳ ኤራቴላይ ኣ ፃላላው ዴዒያ ኢቲ ያሳው ዩሱሲ ኪሪሰቶሳ ባጋና ሜዲናው ቦንቹ ጊደ። አሜንዒ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source
files dated 29 Jan 2022
585b63ca-b8e6-55c8-bfef-10bdc95ad69c